

舊五代史

六



舊五代史卷三十

宋司空同中書門下平章事薛居正等撰

莊宗紀第四

唐書六

同光元年冬十月辛未朔日有蝕之是日皇后劉氏皇子繼岌歸鄴宮帝送于離亭歔歔而別詔宣徽使李紹宏宰相豆盧革租庸使張憲興唐尹王正言同守鄴城壬申帝御大軍自楊劉濟河癸酉至鄆州是夜三鼓渡汶時王彥章守中都甲戌帝攻之中都素無城守師旣雲合梁眾自潰是日擒梁將王彥章及都監張漢傑趙廷隱劉嗣彬李知節康文通王山興等將吏二百餘人

斬馘二萬奪馬千匹時旣獲中都之捷帝召諸將謀其所向或言且徇兗州徐圖進取唯李嗣源曰宜急趨汴州段凝方領大軍駐于河上假如便來赴援直路又阻決河須自滑州濟渡十萬之眾舟楫焉能卒辦此去汴城咫尺若晝夜兼程星宿卽至段凝未起河壩夷門已爲我有矣臣請以千騎前驅陛下御軍徐進鮮不克矣帝嘉之是夜嗣源率前軍先進翌日車駕卽路丁丑次曹州郡將出降已卯遲明前軍至汴城嗣源令左右捉生攻封丘門梁開封尹王瓚請以城降俄而帝與大軍繼至王瓚迎帝自大梁門入梁朝文武官屬于馬前謁

見陳叙世代唐臣陷在僞廷今日再睹中興雖死無恨  
帝諭之曰朕二十年血戰蓋爲卿等家門無足憂矣各  
復乃位時梁末帝朱鐸已爲其將皇甫麟所殺獲其首  
函之以獻是日賜樂工周匝幣帛周匝者帝之寵伶也  
胡柳之役陷于梁帝每思之至是謁見欣然慰接周匝  
因言梁教坊使陳俊保庇之恩垂泣推薦請除郡守帝  
亦許之庚辰帝御元德殿梁百官于朝堂待罪詔釋之  
壬午段凝所部馬步軍五萬解甲于封丘凝等率大將  
先至請死詔各賜錦袍御馬金幣帝幸北郊撫勞降軍  
各令還本營丙戌詔曰懲惡勸善務振紀綱激濁揚清

須明眞僞蓋前王之令典爲歷代之通規必按舊章以  
令多士而有志朋僭竊位忝崇高累世官而皆受唐恩  
貪爵祿而但從僞命或居台鉉或處權衡或列近職而  
預機謀或當峻秩而掌刑憲事分逆順理合去留僞宰  
相鄭珏等一十一人皆本朝簪組儒苑品流雖博識多  
聞備明今古而修身慎行頗負祖先昧忠貞而不度安  
危專利祿而全虧名節合當大辟無恕近親朕以纘嗣  
丕基初平巨憝方務好生之道在行含垢之恩湯網垂  
仁既務全族舜刑投裔兼貸一身爾宜自新我全大體  
其爲顯列不並庶寮餘外應在周行悉仍舊貫凡居中

外咸體朕懷乃貶梁宰相鄭珏爲萊州司戶蕭頊爲登  
州司戶翰林學士劉岳爲均州司馬任贊房州司馬姚  
顓復州司馬封翹唐州司馬李懌懷州司馬竇夢徵沂  
州司馬崇政院學士劉光素密州司戶陸崇安州司戶  
御史中丞王權隨州司戶並員外置同正員是日以梁  
將段凝上疏奏梁朝權臣趙巖等並助成虐政結怨于  
人聖政惟新宜誅首惡乃下詔曰朕旣殄僞庭顯平國  
患好生之令含弘雖切于予懷懲惡之規決斷難違于  
眾請況趙巖趙鵠等自朕收城數日布惠四方尙匿迹  
以潛形罔悛心而革面須行赤族以謝眾心其張漢傑

昨于中都與王彥章同時俘獲此際未詳行止偶示哀  
矜今既上將陳詞羣情激怒往日既彰于僭濫此時難  
漏于網羅宜寘國刑以塞羣論除妻兒骨肉外其他疎  
屬僕使並從釋放敬翔李振首佐朱溫共傾唐祚屠害  
宗屬殺戮朝臣既寰宇以皆知在人神而共怒敬翔雖  
聞自盡未豁幽寃宜與李振並族于市疎屬僕使並從  
原宥朱珪素聞狡蠹唯務讒邪鬪惑人情枉害良善將  
清內外須切去除况眾狀指陳亦宜誅戮契丹沙喇鄂  
博舊作撒刺阿既棄其母又背其兄朕比重懷來厚加  
撥今改正恩渥看同骨肉錫以姓名兼分符竹之榮累被頒宣之

渥而乃輒辜重惠復背明庭罔顧欺違竄歸僞室既同  
梟獍難貸刑章可并妻子同戮于市其朱氏近親趙鶴  
正身趙巖家屬仰巖加擒捕其餘文武職員將校一切  
不問是日趙巖張希逸張漢傑張漢倫張漢融朱珪敬  
翔李振及契丹沙喇鄂博等并其妻孥皆斬于汴橋下  
又詔除毀朱氏宗廟神主僞梁二主并降爲庶人天下  
官名府號及寺觀門額曾經改易者並復舊名時帝欲  
發梁祖之墓斲棺燔柩河南尹張全義上章申理乞存  
聖恩通鑑張全義上言朱溫雖國之深讐然其人已死  
刑無可加屠滅其家足以爲報乞免焚斲以存聖  
恩帝乃止令剗去闕室而已丁亥梁百官以誅凶族于



崇元殿立班待罪詔各復其位

洛陽縉紳舊聞記載張全義表云伏念臣誤棲

惡木曾飲盜泉實有瑕疵未蒙昭雪因下詔雪之

以樞密使檢校太保守兵部

尚書郭崇韜權行中書公事己丑御崇元殿制曰伏順  
討逆少康所以誅有窮續業承基光武所以滅新莽咸  
以中興景命再造王猷經綸于草昧之中式遏于亂畧  
之際朕以欽承大寶顯荷鴻休雖繼前修固慙涼德誓  
平元惡期復本朝屬四海之阡危允萬邦之推戴近者  
親提組練徑掃氛祲振已墜之皇綱殄偷安之寇孽國  
讎方雪帝道爰開拯編氓覆溺之艱救率土倒懸之苦  
粵自朱溫構逆友貞嗣凶篡殺二君隳殘九廟虺毒久

傷于宇宙狼貪肆噬于華夷剝喪元良凌辱神主帝里  
動黍離之嘆朝廷多棟橈之危棄德崇奸窮兵黷武戰  
士疲勞于力役烝民耗竭其膏腴言念于斯軫傷彌切  
今則已梟逆豎大豁羣情覩厯數之有歸實神靈之匪  
昧得不臨深表誠馭朽爲懷將引濟于艱難宜特行于  
赦宥應僞命流貶責授官等已經量移者並可復資徒  
流人放歸鄉里京畿及諸道見禁囚徒大辟罪降從流  
已下咸赦除之其鄭珏等一十一人未在移復之限應  
扈從征討將校及諸官員職掌節級馬步兵士及河北  
諸處屯駐守戍兵士等皆情堅破敵業茂平淮副予戲

定之謀顯爾忠勤之節並據等第續議獎酌其有歿于  
王事未經追贈者各與贈官如有子孫堪任使者並量  
材錄任應僞庭節度觀察防禦團練等使及刺史監押  
行營將校等並頒恩詔不議改更仍許且稱舊銜當俟  
別加新命理國之道莫若安民勸課之規宜從薄賦庶  
遂息肩之望冀諧鼓腹之謠應諸道戶口並宜罷其差  
役各務營農所係殘欠賦稅及諸務懸欠積年課利及  
公私債負等其汴州城內自收復日已前並不在徵理  
之限其諸道自壬午年十二月已前並放北京及河北  
先以祆祿未平配買征馬如有未請却官本錢及買馬

不迨者可放免應有本朝宗屬及內外文武臣寮被朱氏無辜屠害者並可追贈如有子孫及本身逃難于諸處漂寓者並令所在尋訪津置赴闕義夫節婦孝子順孫旌表門閭量加賑給或鰥寡惻獨無所告者仰所在各議拯救民年過八十者免一子從征其有先投過偽庭將校官吏等一切不問云甲午以樞密使檢校太保守兵部尙書太原縣男郭崇韜爲開府儀同三司守侍中監修國史兼眞定尹成德軍節度使依前樞密使太原郡侯仍賜鐵券乙未詔宰相豆盧革權判吏部上銓御史中丞李德休權判東西銓事丙申滑州留後檢校

太保段凝可依前滑州留後仍賜姓名紹欽以金紫光祿大夫檢校司空守輝州刺史杜晏球爲檢校司徒依前輝州刺史仍賜姓名紹虔詔處斬隨駕兵馬都監夏彥朗于和景門外時宦官怙寵廣侵占居人第舍郭崇韜奏其事乃斬彥朗以狗丁酉賜百官絹二千匹錢二百萬職事絹一千匹錢百萬戊戌以竭忠啟運匡國功臣天平軍節度使開府儀同三司檢校太傅兼侍中蕃漢馬步總管副使隴西郡侯李嗣源爲依前檢校太傅兼中書令天平軍節度使特進封開國公加食邑實封餘如故以開府儀同三司檢校太傅北都留守興聖宮

使判六軍諸衛事李繼岌爲檢校太尉同平章事充東京留守詔御史臺班行內有欲求外職或要分司各許於中書投狀奏聞己亥宴勲臣于崇元殿梁室故將咸預焉帝酒酣謂李嗣源曰今日宴客皆吾前日之勍敵一旦同會皆卿前鋒之力也梁將霍彥威戴思遠等皆伏陛叩頭帝因賜御衣酒器盡歡而罷齊州刺史孟璆上章請死詔原之璆初事帝爲騎將天祐十三年帝與劉鄩莘縣對壘璆領七百騎奔梁至是來請罪帝報之曰爾當吾急引七百騎投賊何面目相見璆惶恐請死帝恕之未幾移貝州刺史庚子帝畋于汴水之陽十一

月辛丑朔有司奏河南州縣見使僞印望追毀改鑄從之以光祿大夫檢校太傅左金吾上將軍兼領左龍武軍事汾州刺史李存渥爲滑州節度使加特進同平章事以雜指揮散員都部署特進檢校太傅忻州刺史李紹榮爲徐州節度使以滑州兵馬留後檢校太保李紹欽爲兗州節度使壬寅鳳翔節度使秦王李茂貞遣使賀收復天下癸卯河中節度使西平王朱友謙來朝乙巳賜友謙姓改名繼麟帝令皇子繼岌兄事之以捧日都指揮使博州刺史康延孝爲鄭州防禦使檢校太保賜姓名繼琛以宋州節度使檢校太尉平章事袁象先

依前爲宋州節度使仍賜姓名紹安以許州匡國軍節度使檢校太尉同平章事溫韜依前許州節度使仍賜姓名紹冲丁未日南至帝不受朝賀戊申中書門下上言以朝廷兵革雖寧支費猶闕應諸寺監各請置少卿少監祭酒司業各一員博士兩員餘官並停唯太常寺事關大禮大理寺關刑法除太常博士外許更置丞一員其王府及東宮官司天五官正奉御之屬凡關不急司存並請未議除授其諸司郎中員外應有雙曹者且置一員左右常侍諫議大夫給事中起居郎起居舍人補闕拾遺各置一半三院御史仍委御史中丞條理申



奏其停罷朝官仍各錄名銜具罷任時日留在中書候見任官滿二十五箇月並據資品却與除官其西班牙上將軍已下仍望宣示樞密院斟酌施行從之時議者以中興之朝事宜恢廓驟茲自弱頓失物情已酉詔應隨處官吏務局員寮諸軍將校等如聞前例各有進獻直貢章奏不唯褻黷于朝廷實且傍滋于誅歛並宜止絕以肅化風又詔左降均州司馬劉岳有母年踰八十近聞身故準故事許歸候三年喪服闋如未量移卽却赴貶所壬子詔取今月二十四日幸洛京以十二月二十三日朝獻太微宮二十四日朝獻太廟二十五日有事

于南郊癸未中書門下奏應隨駕及在京有帶兼官者  
並望落下只守本官從之乙卯以特進檢校太傅開封  
尹判六軍諸衛事充功德使王瓚爲宣武軍節度副使  
權知軍州事丁巳以銀青光祿大夫尙書左丞趙光胤  
爲中書侍郎平章事集賢殿大學士以朝散大夫禮部  
侍郎韋說守本官同平章事以吏部侍郎史館修撰判  
館事盧文度爲兵部侍郎充翰林學士以右散騎常侍  
充弘文館學士判館事馮錫嘉爲戶部侍郎知制誥充  
翰林學士以翰林學士守尙書膳部員外郎劉昫爲比  
部郎中知制誥依前充職以扈鑾書制學士行尙書倉

部員外郎趙鳳爲倉部郎中知制誥充翰林學士以左  
拾遺于嶠守本官充翰林學士戊午以中書侍郎平章  
事豆盧革判租庸使兼諸道鹽鐵轉運等使新羅王金  
朴英遣使貢方物己未以洛京留守判六軍諸衛事守  
太尉兼中書令河南尹魏王張全義爲檢校太師守中  
書令餘如故以荆南節度使檢校太師守中書令渤海  
王高季興爲依前檢校太師守中書令餘如故庚申以  
工部尙書眞定尹北都副留守知留守事任圜爲檢校  
吏部尙書兼御史大夫充成德軍節度使行軍司馬知  
軍府事安義軍節度使李繼韜入見待罪詔釋之辛酉

以宣化軍留後檢校太傅戴思遠權知青州軍州事檢校司空左監門上將軍安崇阮並檢校舊官却復本任以鎮國軍留後檢校太傅霍彥威爲保義軍節度留後以權知威化軍留後檢校司徒高允貞權知鎮國軍留後以權知河陽留後檢校太保張繼業依前權知河陽留後以鄜延兩鎮節度使檢校太師兼中書令西平王高萬興依前鄜延節度使仍封北平王襄州節度使檢校太傅平章事孔勅依前襄州節度使餘如故以永平軍節度使行大安尹檢校太保張筠爲西都留守行京兆尹以晉州節度使檢校太保劉玘邠州節度使檢校

太保韓恭安州節度使檢校太保朱漢賓並檢校舊官  
却復本任壬戌以左金吾衛大將軍史敬鎔爲左衛使  
右金吾衛大將軍李存確爲右衛使甲子車駕發汴州  
十二月庚午朔車駕至西京是日有司自石橋具儀仗  
法物迎引入于大內辛未以百官初到放三日朝參壬  
申以租庸使刑部侍郎太清宮副使張憲爲檢校吏部  
尙書充北京副留守知留守事太原尹詔改取來年二  
月一日行郊禮戊寅詔德勝寨莘縣楊劉口通津鎮胡  
柳陂皆戰陣之所宜令逐處差人收掩戰士骸骨量備  
祭奠以慰勞魂詔改僞梁永平軍大安府復爲西京京

北府改宋州宣武軍爲歸德軍汴州開封府復爲宣武  
軍華州感化軍爲鎮國軍許州匡國軍復爲忠武軍滑  
州宣義軍復爲義成軍陝府鎮國軍復爲保義軍耀州  
靜勝軍復爲順義軍潞州匡義軍復爲安義軍朗州武  
順軍復爲武貞軍延州爲彰武軍鄧州爲威勝軍晉州  
爲建雄軍安州爲安遠軍淮南楊溥遣使賀登極稱大  
吳國主書上大唐皇帝十國春秋吳世家云唐以滅梁  
來告始稱詔我國不受唐主隨  
易書用敵國禮曰大唐皇帝致書于吳國主王遣司農  
卿盧蘋獻金器二百兩銀器三千兩羅錦一千二百疋  
龍腦香五斤龍鳳絲鞵一百事于唐又遣使張景  
報聘稱大吳國主上書大唐皇帝辭禮如牋表

禁屠牛馬庚辰御史臺上言請行用本朝律令格式今

訪聞唯定州有本朝法書望下本州寫副本進納從之  
辛巳詔貶安義軍節度使李繼韜爲登州長史尋斬于  
天津橋下再謀叛故也甲申淮南楊溥奚首領李紹威  
並遣使朝貢乙酉以翰林學士承旨盧質權知汴州軍  
府事以禮部尙書崔沂爲尙書左丞判吏部尙書銓事  
以兵部侍郎崔協爲吏部侍郎以刑部侍郎充集賢殿  
學士判院事盧文紀爲尙書兵部侍郎依前充集賢殿  
學士判院事丁亥澤州刺史董璋上言潞州軍變李繼  
達領兵出城自刎而死節度副使李繼珂已安撫軍城  
己丑有司上言上辛祈穀于上帝請奉高祖神堯皇帝

配孟夏雩祀請奉太宗文皇帝配季秋大享于明堂請  
奉太祖武皇帝配冬至日祀圜丘請奉獻祖文皇帝配  
孟冬祭神州地祇請奉懿祖昭聖皇帝配從之辛卯亳  
州太清宮道士上言聖祖玄元皇帝殿前枯檜再生一  
枝畫圖以進詔曰當聖祖舊殿生枯檜新枝應皇家再  
造之期顯大國中興之運同上林仆柳祥旣叶于漢宣  
比南頓嘉禾瑞更超于光武宜標史冊以示寰瀛云  
代會要云唐高祖神堯皇帝武德二年枯檜重華至安  
祿山僭號萎瘁玄宗自蜀歸京枝葉復盛至是再生一  
枝長二尺餘蓋一時誇詡之言也壬辰幸伊闕己巳以中書舍人崔居  
儉爲刑部侍郎充史館修撰判館事甲午以租庸副使



光祿大夫檢校司徒守衛尉卿孔謙爲鹽鐵轉運副使

永樂大典卷七  
千一百五十六

舊五代史卷三十終

舊五代史卷三十攷證

唐莊宗紀四以趙光允爲中書侍郎平章事集賢殿大學士  
案歐陽史作趙光允爲中書侍郎不載大學士銜與是書詳畧異

甲子車駕發汴州十二月庚午朔車駕至西京 案歐

陽史作甲子如洛京庚午至自汴州是書作西京蓋其時未改永平軍爲西京故尙仍梁制稱洛陽爲西京也又通鑑攷異云諸書但謂之洛京未嘗詔改西京爲洛京至同光三年始詔依舊以洛京爲東都或者以永平爲西京時卽改梁西京爲洛京而史脫其

文也歐陽史于元年冬卽書洛京未審所據

詔改僞梁永平軍大安府復爲西京京兆府 案歐陽

史作十一月辛酉復永平軍爲西都與是書日月互  
異

實喇鄂博舊作撒刺阿撥今改

舊五代史卷三十攷證

舊五代史卷三十一

宋司空同中書門下平章事薛居正等撰

莊宗紀第五

唐書七

同光二年春正月庚子朔帝御明堂殿受朝賀仗衛如

式壬寅南郊禮儀使太常卿李燕進太廟登歌酌獻樂

舞名懿祖室曰昭德之舞獻祖室曰文明之舞太祖室

曰應天之舞昭宗室曰永平之舞甲辰幽州上言契丹

入寇至瓦橋

契丹國志時契丹日益強盛遣使就唐求幽州以處盧文進

以天平軍

節度使李嗣源爲北面行營都招討使陝州留後霍彥

威爲副率軍援幽州已已故宣武軍節度副使權知軍

州事檢校太傅王瓚贈太子太師丁未詔改朝元殿復  
爲明堂殿又改崇勲殿爲中興殿戊申以振武軍節度  
使檢校太傅同平章事李存霸權知潞州留後以知保  
大軍軍州事高允韜爲檢校太保庚戌以涇原節度使  
充秦王府諸道行軍司馬開府儀同三司檢校太尉兼  
侍中李從曠爲檢校太尉兼中書令依前涇原節度使  
充秦王府諸道行軍司馬詔改應順門爲永曜門太平  
門爲萬春門通政門爲廣政門鳳明門爲韶和門萬春  
門爲中興門解卸殿爲端明殿是日詔曰皇綱已正紫  
禁方嚴凡事內官不合更居外地詔諸道應有內官不

計高低並仰逐處并家口發遣赴闕不得輒有停滯帝  
龍潛時寺人數已及五百至是合諸道赴闕者約千餘  
人皆給賜優贍服玩華侈委之事務付以腹心唐時宦  
官爲內諸司使務諸鎮監軍出納王命造作威福昭宗  
以是亡國及帝奄有天下當知戒彼前車以爲殷鑒一  
朝復興茲弊議者惜之新羅王金朴英遣使朝貢辛亥  
中書門下奏準本朝故事諸王內命婦宰臣學士中書  
舍人諸道節度防禦團練使留後官告及中書帖官告  
院索綾紙標軸下所司書寫印署畢進入宣賜其文武  
兩班及諸道官員并奏薦將校並合于所司送納朱膠

綾紙價錢伏自僞梁不分輕重並從官給今後如非前  
件事例諸官中不給告勅其內司大官侍衛將校轉官  
卽不在此限從之壬子蜀主王衍致書于帝稱有詐爲  
天使馳報收復汴州者詔捕之不獲癸丑有司奏郊祀  
前二日迎祔高祖太宗懿祖獻祖太祖神主于太廟議  
者以中興唐祚不宜以追封之祖雜有國之君以爲昭  
穆自懿祖已下宜別立廟于代州如後漢南陽故事可  
也北面軍前奏契丹還塞詔李嗣源班師鳳翔節度使  
秦王李茂貞上表請行藩臣之禮帝優報之甲寅帝于  
中興殿面賜郭崇韜鐵券有司上言皇太后到闕皇帝

合于銀臺門內奉迎詔親至懷州奉迎中書奏自二十三日後散齋內車駕不合遠出詔改至河陽奉迎以禮部尙書興唐尹王正言依前禮部尙書充租庸使乙卯渤海國遣使貢方物幽州奏媯州山後十三寨百姓却復新州戊午以前太子少師薛廷珪爲檢校戶部尙書太子少師致仕以前太子賓客封舜卿爲太子少保致仕以前太子賓客李文規爲戶部侍郎致仕詔鹽鐵度支戶部並委租庸使管轄庚申四方館上言請今後除隨駕將校及外方進奉專使文武班三品已上官可以內殿對見其餘並請正衙以申常禮從之車駕幸河陽



奉迎皇太后辛酉帝侍皇太后至文武百寮迎于上東門是日河中府上言稷山縣割隸絳州以太僕卿李紆爲宗正卿以衛尉卿楊邁爲太僕卿西京昭應縣華清宮道士張中虛上言天尊院枯檜重生枝葉乙丑有司上言南郊朝享太廟舊例親王充亞獻終獻行事乃以皇子繼岌爲亞獻皇弟存紀爲終獻丙寅帝赴明堂殿致齋丁卯朝饗于太微宮戊辰饗太廟是日赴南郊二月己巳朔親祀昊天上帝于圜丘禮畢宰臣率百官就次稱賀還御五鳳樓宣制大赦天下應同光二年二月一日昧爽已前所犯罪無輕重常赦所不原者咸赦除

之十惡五逆屠牛鑄錢故殺人合造毒藥持杖行劫官  
典犯贓不在此限應自來立功將校各與轉官仍加賞  
給文武常參官節度觀察防禦刺史軍主都虞候指揮  
使父母亡歿者並與追贈在者各與加爵增封諸藩鎮  
各賜一子出身仍封功臣名號留後刺史官高者加階  
爵一級官卑者加官一資應本朝內外臣寮被朱氏殺  
害者特與追贈應諸州府不得令富室分外收貯見錢  
禁工人鎔錢爲銅器勿令商人載錢出境近年已來婦  
女服飾異常寬博倍費縑綾有力之家不許卑賤悉衣  
錦繡宜令所在糾察應有百姓婦女曾經俘擄他處爲

婢妾者一任骨肉識認男子曾被刺面者給與憑據放逐營生召天下有能以書籍進納者各等第酬獎仰有司速檢勘天下戶口正額墾田實數待憑條理以息煩苛是日風景和暢人胥悅服議者云五十年來無此盛禮然自此權臣復戾伶官用事吏人孔謙酷加賦斂赦文之所原放謙復刻剝不行大失人心始于此矣庚午租庸使孔謙奏諸道綱運客旅多于私路苟免商稅請令所在關防嚴加捉搦從之癸酉宰臣豆盧革率百官上尊號曰昭文睿武至德光孝皇帝凡三上表從之甲戌詔曰汴州元管開封浚儀封丘雍丘尉氏陳留六縣

僞庭割許州鄆陵扶溝陳州太康鄭州陽武中牟曹州  
考城等縣屬焉其陽武匡城扶溝考城四縣宜令且隸  
汴州餘還本部丙子以隨駕參謀耿瑗爲司天監丁丑  
以光祿大夫檢校司徒李筠爲右騎衛上將軍戊寅幸  
李嗣源第作樂盡歡而罷己卯以河中節度使冀王李  
繼麟兼安邑解縣兩池榷鹽使辛巳以檢校太師守尙  
書令河南尹判六軍諸衛事魏王張全義爲守太尉兼  
中書令河陽節度使河南尹改封齊王以開府儀同三  
司守尙書令秦王李茂貞依前封秦王餘如故仍賜不  
拜不名

案五代會要太常禮院奏李茂貞封册之命宜  
准故襄州節度使趙匡凝之例施行秦王受册

自備革輅一乘載册犢車一乘  
并本品鹵簿鼓吹如儀從之  
是日帝幸左龍武軍癸

未宰臣豆盧革率百官上表請立中宮制以魏國夫人  
劉氏爲皇后仍令所司擇日備禮册命丁亥以天平軍  
節度使蕃漢總管副使開府儀同三司檢校太傅兼中  
書令李嗣源爲檢校太尉依前天平軍節度使加實封  
百戶兼賜鐵券以前安國軍節度副使檢校太保左衛  
上將軍李存乂爲晉州節度使檢校太傅以北京皇城  
留守檢校太保左威衛上將軍李存紀爲邢州節度使  
加檢校太傅以蕃漢馬步都虞候兼東京馬步軍都指  
揮使檢校太保朱守殷爲振武節度使加檢校太傅戊

子以前右龍武軍都虞候守左龍武大將軍李紹奇爲  
鄭州防禦使以楚州防禦使張繼孫爲汝州防禦使已  
丑以振武軍節度使權安義留後檢校太傅平章事李  
存霸爲潞州節度使以捧日都指揮使鄭州防禦使李  
紹琛爲陝州節度使以成德軍馬步軍都指揮使右監  
門衛大將軍毛璋爲華州節度使壬辰樞密使郭崇韜  
再上表請退樞密之職優詔不允癸巳詔曰皇太后母  
儀天下子視羣生當別建宮闈顯標名號冀因稱謂益  
表尊嚴宜以長壽宮爲名樞密使郭崇韜奏時務利便  
一十五件優詔褒美甲午奚王李紹威吐渾李紹魯皆

貢駝馬丁酉以武安軍衛內馬步軍都指揮使昭州刺史馬希範爲永州刺史檢校太保癸卯以光祿大夫檢校左僕射行太常卿李燕爲特進檢校司空依前太常卿以御史中丞李德休爲兵部侍郎以吏部侍郎崔協爲御史中丞三月甲辰故河陽節度使王師範贈太尉乙巳以滄州節度使檢校太傅同平章事符習爲青州節度使以北京衛內馬步軍都指揮使右領軍衛大將軍李紹斌爲滄州節度使鎮州奏契丹犯塞詔李嗣源率師屯邢州丙午以荆南節度使守中書令渤海王高季興依前檢校太師兼尙書令封南平王以幽州節度

行軍司馬李存賢依前檢校太保爲幽州節度使中書門下上言近以諸州奏薦令錄頗亂規程請今後節度使管三州已上每年許奏管內官三人如管三州已下只奏兩人仍須課績尤異方得上聞防禦使只許奏一人刺史無奏薦之例從之已酉以太子少保李琪爲刑部尚書庚戌幽州奏契丹寇新城是日詔諸軍將校自檢校司空已下宜賜叶謀定亂匡國功臣自檢校僕射尚書常侍及諫議大夫並賜忠果拱衛功臣初帶憲銜者並賜忠烈功臣節級長行並賜扈蹕功臣中書門下上言州縣官在任考滿卽具關申送吏部格式本道不



得差攝官替正官從之

五代會要同光二年中書門下奏刺史縣令有政績尤異為眾

所知或招復戶口能增加賦稅者或辨雪冤獄能拯人命者或去害物之積弊立利世之新規有益時政為眾所推者即仰本處逐件分明聞奏當議獎擢或在任貪猥誅戮生靈公事不治為政怠惰亦加懲罰其州縣官任滿三考即具關申送吏部格式候勅除銓注其本道不得差攝官替正授者從之

有司上言皇

帝四月一日御文明殿受冊徽號合服袞冕御殿前一

日散齋于內殿從之是日李嗣源上表乞退兵權詔不

允是時伶人景進用事閹官競進故重臣憂懼拜章請

退癸丑左諫議大夫竇專上言請廢租庸使名目事歸

三司疏奏不報唐州奏木連理詔先省員官除已別授

官外其左散騎常侍李文矩等三十人却復舊官太子

詹事石戩等五人宜以本官致仕將作少監岑保嗣等  
十四人續勅處分丙辰責授萊州司戶鄭珏等一十一  
人並量移近地尚書戶部侍郎知貢舉趙頎卒以中書  
舍人裴皞權知貢舉禁用鈔錫錢丁巳中書門下奏懿  
祖陵請以永興爲名獻祖陵請以長甯爲名太祖陵請  
以建極爲名從之淮南楊溥遣使貢賀郊天禮物十國春秋  
吳世家王遣右衛上將軍許確進賀郊天銀二千兩錦  
綺羅一千二百疋細茶五百斤象牙四株犀角十株于  
唐戊午詔應南郊行事官並付三銓磨勘優與處分巳  
未以大理卿張紹珪充制置安邑解縣兩池榷鹽使幸  
左龍武軍以皇子繼岌代張全義判六軍諸衛事故也

癸亥以彰武保太等軍節度使北平王高萬興可依前  
延州鄜州節度使檢校太保兼中書令北平王甲子幸  
東宅夏四月己巳朔帝御文明殿具袞冕受冊尊號曰  
昭文睿武至德光孝皇帝壬申以成德軍節度行軍司  
馬權知府事任圜爲檢校右僕射權北面水陸轉運制  
置使甲戌以順義軍留後華溫琪依前檢校太保充留  
後乙亥以天策上將軍武安等軍節度使守太師中書  
令楚王馬殷可依前守太師兼尙書令詔在京諸道節  
度使刺史令各歸本任丁丑以前幽州節度使內外蕃  
漢馬步總管檢校太師兼中書令李存審爲宣武軍節

度使餘如故己卯帝御文明殿冊魏國夫人劉氏爲皇后庚辰賜郭彥威姓名曰紹真癸未以宋州節度使李紹安依前檢校太尉同平章事宋州節度使以許州節度使李繼冲依前檢校太尉同平章事許州節度使以襄州節度使孔勅佐前檢校太傅同平章事襄州節度使甲申以樞密副使通議大夫行內侍省內侍宋唐玉爲左監門衛將軍同正依前樞密副使以內客省使通議大夫行內侍省內侍楊希朗爲右監門衛將軍同正依前內客省使並賜推忠匡佐功臣車駕幸龍門丙戌迴鶻遣使貢方物己丑以夏州節度使李仁福依前檢

校太師兼中書令夏州節度使封朔方王以朔方河西  
等軍節度使韓洙依前檢校太傅兼侍中充朔方河西  
等軍節度使靈鹽威警雄涼甘肅等州觀察使辛卯以  
宣徽南院使判內侍省兼內局特進左監門將軍同正  
李紹宏爲右領軍衛上將軍癸巳以靜江軍節度使扶  
風郡王馬竇爲檢校太師兼中書令依前靜江軍節度  
使以朗州節度使馬希振爲檢校太傅兼侍中依前朗  
州節度使鳳翔節度使秦王李茂貞薨丙申潞州小校  
楊立據城叛

案歐陽作三月潞州將楊立反與薛史以  
異五代春秋作四月盜據潞州與薛同

李嗣源爲招討使陝州留後紹真爲副率師以討之

永樂

大典卷七千  
一百五十六

舊五代史卷三十一終



舊五代史卷三十一攷證

唐莊宗紀五開府儀同三司守尚書令秦王李茂貞

秦王通鑑作岐王

鎮州奏契丹犯塞詔李嗣源率師屯邢州 案通鑑詔

橫海節度使李紹斌北京指揮使李從珂帥騎兵分  
道備之與是書異

靈鹽威警雄京甘肅等州觀察使 案威警疑當作威

涇攷通鑑注云警州在涇原西今仍其舊



舊五代史卷三十一攷證

舊五代史卷三十二

宋司空同中書門下平章事薛居正等撰

莊宗紀第六

唐書八

同光二年夏五月己亥帝御文明殿册齊王張全義爲太尉禮畢全義赴尙書省領事左諫議大夫竇專不降階爲御史所劾專援引舊典宰相不能詰寢而不行庚子太常卿李燕卒壬寅以教坊使陳俊爲景州刺史內園使

案歐陽史作內園栽接使考五代會要內園栽接使係梁時雜使創置之官

儲德源爲

憲州刺史皆梁之伶人也初帝平梁俊與德源皆爲寵

伶周匝所薦帝因許除郡郭崇韜以爲不可伶官言之

者眾帝密召崇韜謂之曰予已許除郡經年未行我慙

見二人卿當屈意行之故有是命

清異錄同光既卽位猶襲故態身預俳優

尙方進御巾裏名品日新今

伶人所頂尙有傳其遺製者甲辰以兗州節度使李紹

欽依前檢校太保兗州節度使進封開國侯以邠州節  
度使韓恭依前檢校太保邠州節度使進封開國伯丙  
午以福建節度使閩王王審知依前檢校太師守中書  
令福建節度使戊申幸郭崇韜第己酉詔天下收撤防  
城之具不得修濬池隍以西都留守京兆尹張筠依前  
檢校太保充西都留守甲寅以滄州節度使李紹斌充  
東北面招討使以兗州節度使李紹欽爲副招討使以

宣徽使李紹宏爲招討都監率大軍渡河而北時幽州  
上言契丹將寇河朔故也乙卯潞州叛將楊立遣使健  
步奉表乞行赦宥帝遣樞密副使宋唐玉賫勅書招撫  
幽州上言契丹營于州東南丙辰渤海國王大謹譔遣  
使貢方物以澶州刺史李審益爲幽州行軍司馬蕃漢  
內外都知兵馬使辛酉故澤潞節度使丁會贈太師詔  
割復州爲荆南屬郡壬戌以權知鳳翔軍府事涇州節  
度使李曦爲起復雲麾將軍右金吾大將軍同正依前  
檢校太尉兼中書令充鳳翔節度使乙丑以權知歸義  
軍留後曹義金爲歸義軍節度使沙州刺史檢校司空

丙寅李嗣源奏收復潞州幽州上言新授宣武軍節度使李存審卒六月甲戌中書侍郎兼吏部尙書平章事弘文館大學士豆盧革加右僕射餘如故侍中監修國史兼樞密使鎮州節度使郭崇韜進爵邑加功臣號中書侍郎平章事集賢殿大學士趙光裔加兼戶部尙書禮部侍郎平章事韋說加中書侍郎宋州奏節度使李紹安卒丙子李嗣源遣使部送潞州叛將楊立等到闕並磔于市潞州城峻而隍深至是帝命剗平之因詔諸方鎮撤防城之備焉丁丑有司上言洛陽已建宗廟其北京太廟請停從之甲申以衛國夫人韓氏爲淑妃燕

國夫人伊氏爲德妃仍令所司擇日冊命故河東節度  
副使守左諫議大夫李襲吉贈禮部尙書故河東節度  
副使禮部尙書蘇循贈左僕射故河東觀察判官檢校  
右僕射司馬揆贈司空故河東留守判官工部尙書李  
敬義贈右僕射丙戌以順義軍節度使李令錫爲許州  
節度使以前保義軍留後李紹真爲徐州節度使以徐  
州節度使李紹榮爲宋州節度使戊子汝州防禦使張  
繼孫賜死于本郡繼孫卽齊王張全義之假子也本姓  
郝氏爲兄繼業訟其陰事故誅之

案冊府元龜載張繼業爲河陽兩使留後

莊宗同光二年六月繼業上疏稱弟繼孫本姓郝有母尙在父全義養爲假子令管衙內兵士自皇帝到京繼

孫私藏兵甲招置部曲欲圖不軌兼私家淫縱無別無  
義臣若不自陳恐累家族勅曰有善必賞所以勸忠孝  
之方有惡必誅所以絕姦邪之迹其或罪狀騰于眾口  
醜行布于近親須舉朝章冀明國法汝州防禦使張繼  
孫本非張氏子孫自小丐養以至成立備極顯榮而不  
能酬撫育之恩履謙恭之道擅行威福常恣姦兇侵奪  
父權惑亂家事縱鳥獸之行畜梟獍之心有識者所不  
忍言無賴者寔爲其黨而又橫征暴斂虐法峻刑藏兵  
器于私家殺平人于廣陌罔思悛改難議矜容宜竄逐  
于遐方仍歸還于姓氏俾我勲賢之族永除污穢之風  
凡百臣寮宜體朕命可貶房州司戶參軍  
同正兼勒復本姓尋賜自盡仍籍沒資產

已丑以廻紇

可汗仁美爲英義可汗詔改輝州爲單州庚寅故左僕  
射裴樞右僕射裴贄崔遠並贈司徒故靜海軍節度使  
獨孤損贈司空故吏部尙書陸展贈右僕射故工部尙  
書王溥贈右僕射裴樞等六人皆前朝宰輔爲梁祖所

害于白馬驛至是追贈焉壬辰以天平軍節度使蕃漢  
總管副使開府儀同三司檢校太尉兼中書令李嗣源  
爲宣武軍節度使蕃漢馬步總管餘如故甲午以樞密  
使特進左領軍衛上將軍知內侍省事張居翰爲驃騎  
大將軍守左驍衛上將軍進封開國伯賜功臣號秋七  
月戊戌朔故宣武軍節度使李存審男彥起進其父牙  
兵八千七百人己亥中書門下奏每年南郊壇四祠祭  
太微宮五薦獻並宰臣攝太尉行事惟太廟遣庶寮行  
事此後太廟祠祭亦望差宰臣行事從之己巳汴州雍  
丘縣大風拔木傷稼曹州大雨平地水三尺丙午以襄



州節度使孔勅爲潞州節度使李存霸爲鄆州節度使  
乙酉幸龍門之雷山祭天神從北俗之舊事也辛亥以  
鄆州副使李紹珙爲襄州留後以前澤州刺史董璋爲  
邠州留後戊午西州王衍遣僞署戶部侍郎歐陽彬來  
朝貢稱大蜀皇帝上書大唐皇帝庚申以應州爲雲州  
屬郡升新州爲威塞軍節度使以媯儒武等州爲屬郡  
壬戌皇子繼岌妻王氏封魏國夫人幽州奏契丹案巴  
堅舊作阿保機今改東攻渤海案遼史太祖紀天贊三年五月  
渤海殺其刺史張秀實而掠其  
民于東攻渤海之事闕而不載考五代會要  
同光二年七月契丹東攻渤海國與薛史同  
八月己巳  
詔洛京應有隙地任人請射修造有主者限半年令本

主自修蓋如過限不見屋宇許他人占射辛未北京副  
留守太原尹孟知祥加檢校太傅增邑賜功臣號帝畋  
于西苑癸酉以租庸副使守衛尉卿孔謙爲租庸使以  
右威衛上將軍孔循爲租庸副使甲戌以權知汴州軍  
州事翰林學士承旨戶部尙書盧質爲兵部尙書依前  
翰林學士承旨仍賜論思匡佐功臣丙子以雲州刺史  
雁門以北都知兵馬使安元信爲大同軍節度留後以  
隰州刺史張廷裕爲新州威塞軍節度留後丁丑樞密  
使郭崇韜上表請退不允戊寅租庸使守禮部尙書王  
正言罷使守本官辛巳詔諸道節度觀察防禦團練使

刺史並於洛陽修宅一區中書門下上言請今後諸道

除節度副使兩使判官外其餘職員并諸州軍事判官

各任本處奏辟從之

五代會要同光二年八月八日中書門下奏諸道除節度使及兩使

判官除授外其餘職員并軍事判官伏以翹車著詠堯帛垂文式重弓旌以光尊俎由是副已知之薦成接士之榮必當備悉行藏習知才行允奉幕中之畫以稱席上之珍爰自偶梁頗乖斯義皆從除授以佐藩宣因緣多事之秋慮爽得人之選將期推擇式示更張今後諸道除節度副使判官兩使除授外其餘職員并諸州軍事判官等並在本道本州各當辟舉其軍事判官仍不在奏官之限

未租庸使孔謙進封會稽縣男仍賜豐財贍國功臣准

南楊溥遣使貢方物宋州大水鄆曹等州大風雨損稼

丁亥中書門下侍郎奏請差左丞崔沂吏部侍郎崔貽

孫給事中鄭韜光李光序吏部員外郎盧損等同詳定

選司長定格行資格十道圖從之

五代會要同光二年八月

部三銓下省南曹廢置甲庫格式流外銓等司公事並繫長定格循資格十道圖等前件格文本朝創立檢制姦濫倫叙官資頗謂精詳久同遵守自亂離之後巧偽滋多兼同光二年八月車駕在東京權判工部員外郎盧重本司起請一卷並以興復之始務切懷來凡有條流多失根本以至冬集赴選人並南郊行事官及陪位宗子共一千三百餘人銓曹檢勘之時互有援引去留之際不絕爭論若又依違必長詭濫望差權判尚書省銓左丞崔沂吏部侍郎崔貽孫給事中鄭韜光李光序吏部員外郎盧損等同詳定舊長定格循資格十道圖務令簡要可久施行從之

癸巳放朝參三日以霖雨故也陝州奏河

水溢岸乙未中書門下上言諸靈臺令丞停請以本縣

令知陵臺事從之九月癸卯畋于西北郊幽州上言契

丹案巴堅自渤海國廻軍內園新殿成名曰長春殿戊申以中書舍人權知貢舉裴皞爲禮部侍郎以前鄭州防禦副使姜弘道爲太僕卿侍中郭崇韜奏應三銓注授官員等內有自無出身入仕買覓鬼名告勅今將骨月文書措改姓名或歷任不足妄稱失墜或假人蔭緒託形勢論屬安排參選所司隨例法官如有人陳告特議超獎其所犯人檢格處分若同保人同有僞濫者並當駁放應有人身死之處今後並須申報本州于告身上批書身死月日分明付子孫今後銓司公事至春末並湏了畢從之銓綜之司僞濫日久入崇韜條奏之後

澄法甚嚴放棄者十有七八眾情亦怨之己酉司天臺  
請禁私曆日從之庚戌有司自契丹至者言女真廻鶻  
黃頭室韋合勢侵契丹壬子有司上言八月二十二日  
夜熒惑犯星二度星周分也請依法禳之于京城四門  
懸東流水一罌兼令都市嚴備盜火止絕夜行從之甲  
寅幸郭崇韜第置酒作樂乙卯以前振武節度使安北  
都護馬存可依前檢校太尉兼侍中充甯遠軍節度容  
管觀察使存湖南馬殷之弟也丙辰黑水國遣使朝貢  
契丹寇幽州戊午宣宰臣于中書磨勘吏部選人謬濫  
者焚毀告勅冬十月戊辰帝畋于西北郊己巳故安義

節度使贈太尉隴西郡王李嗣昭贈太師庚午正衙命  
使册淑妃韓氏德妃伊氏以宰臣豆盧革韋說充册使  
辛未詔今後支郡公事須申本道膽狀奏聞租庸使各  
有徵催祇牒觀察使貴全理體契丹寇易定北鄙壬申  
故大同軍防禦使李存璋贈太尉鄆州奏清河泛濫壞  
廬舍癸未吹于石橋甲戌河南尹張全義上言萬壽節  
日請于嵩山開琉璃戒壇度僧百人從之乙亥故守太  
師尙書令秦王李茂貞追封秦王賜諡曰忠敬丁丑皇  
后差使賜兗州節度使李紹欽湯藥時皇太后行誥命  
皇后劉氏行教命互遣使人宣達藩后紊亂之弊人不

敢言已卯汴鄆二州奏大水庚辰以前太僕卿楊邁爲  
大理卿党項進白驢奚王李紹威進馳馬幽州奏契丹  
入寇至近郊辛巳故天雄軍節度副使王緘贈司空壬  
午以天下兵馬都元帥尙父守尙書令吳越國王錢鏐  
可依前天下兵馬都元帥尙父守尙書令封吳越國王  
癸未幸小馬坊閱馬甲申以兩浙兵馬留後清海軍節  
度嶺南東道觀察等使守太尉兼侍中廣州刺史錢元  
瓘爲檢校太師兼中書令充兩浙節度觀察留後餘如  
故以鎮東軍節度副大使江南管内都招討使建武軍  
節度嶺南西道觀察等使檢校太傅守侍中知蘇州中



吳軍軍州事行邕州刺史錢元璩爲檢校太尉兼中書  
令餘如故辛卯天平軍監軍使柴重厚可特進右領衛  
將軍同正充鳳翔監軍使甲午以宣武軍節度押牙李  
從溫李從璋李從榮李從厚李從璨並銀青光祿大夫  
檢校右散騎常侍兼御史大夫宣武軍節度押牙李從  
臻可檢校國子祭酒兼御史中丞自從溫而下皆李嗣  
源諸子也十一月丙申靈武奏甘州迴鶻可汗仁美卒  
其弟狄銀權主國事吐渾白都督族帳移于代州東南  
己亥幸六宅宴諸弟壬寅尙書左丞判吏部尙書銓事  
崔沂貶麟州司馬吏部侍郎崔貽孫貶朔州司馬給事

中鄭韜光貶甯州司馬吏部員外盧損貶府州司戶時  
有選人吳延皓取亡叔告身故舊名求仕事發延皓付  
河南府處死崔沂以下貶官宰相豆盧革趙元裔韋說  
詣閤門待罪詔釋之癸卯帝畋于伊闕侍衛金槍馬萬  
餘共從帝一發中大鹿是日命從官拜梁祖之陵物議  
非之其夕宿于張全義之別墅甲辰宿伊闕縣己巳宿  
樞欄時騎士圍山會夜顛墜崖谷死傷甚眾丙午復命  
衛兵分獵殺獲萬計是夜歸京城六街火炬如晝丁未  
賜羣臣鹿肉有差庚戌制改節將一十一人功臣號辛  
亥以兵部侍郎李德林爲吏部侍郎壬子日南至百官

拜表稱賀以昭儀侯氏爲汧國夫人昭容夏氏爲虢國夫人昭媛白氏爲沛國夫人出使美宣鄧氏爲魏國夫人御正楚真張氏爲涼國夫人司簿德美周氏爲宋國夫人侍真吳氏爲渤海郡夫人其餘並封郡夫人丁巳河中節度使守太師尙書令西平王李繼麟可依前守太師兼尙書令河中護國軍節度使西平王仍賜鐵券戊午幸李嗣源李紹榮之第縱酒作樂是日鎮州地震契丹寇蔚州十二月戊辰幸西苑校獵己巳詔汴州節度使李嗣源歸鎮

案通鑑作己巳命宣武軍節度使李嗣源將宿衛兵三萬七千人赴汴州

遂如幽州禦契丹是嗣源因出師而歸鎮也

庚午帝與皇后劉氏幸張全義

第酒酣帝命皇后拜全義爲養父全義惶恐致謝復出珍貨貢獻翌日皇后傳制命學士草謝全義書學士趙鳳密疏陳國后無拜人臣之禮帝雖嘉之竟不能已其事壬申以教坊使王承顏爲興州刺史丙子詔取來年正月七日幸魏州庚辰畋于近郊至夕還宮壬午契丹寇嵐州党項遣使貢方物乙酉幸龍門佛寺祈雪丙戌以徐州節度使李紹眞爲北面行營副招討使戊子李嗣源奏部署大軍自宣武軍北征淮南楊溥遣使貢獻已丑幸龍門庚寅詔河南尹張全義爲洛京留守判在京諸軍事是日日傍有背氣凡十二

同光三年春正月甲午朔帝御明堂殿受朝賀仗衛如式丙申詔以昭宗少帝山陵未備宜令有司別選園陵改葬尋以年饑財匱而止契丹寇幽州戊戌詔起今後特恩授官及侍衛諸軍將校內諸司等官其告身官給舊例朱膠錢臺省禮錢並停其餘合徵臺省禮錢比舊數五分中許徵一分特恩者不徵兵吏部兩司逐月各支錢四十貫文充吏人食直少府監鑄錢造印文今後不得徵納銅炭價直其料物官給庚子車駕發京師幸鄴以前許州節度使李紹冲爲太子少保以前邠州節度使韓恭爲右金吾大將軍充兩街使以前安州節度

使朱漢賓爲左龍武統軍庚戌車駕至鄴命青州節度使符習修酸棗河隄先是梁末帝決河隄引水東注至鄆濮以限我軍至是方修之丙辰幽州上言節度使李

存賢卒二月甲子朔詔興唐府管內有百姓隨絲鹽錢

每兩與減五十文

案五代會要作每兩與減放五文

逐年所俵蠶鹽每

斛與減五十文小菜豆稅每畝與減放三升都城內所

徵稅絲永與除放丙寅定州節度使王都來朝丁卯畋

于近郊己巳召從臣擊毬于鞠場辛未許州上言襄城

葉縣準勅割隸汝州其扶溝等縣請卻隸當州從之甲

戌以滄州節度使李紹斌爲幽州節度使依前檢校太

保以大同軍留後安元信爲滄州節度使乙亥幸王莽  
河射雁丙子李嗣源奏涿州東南殺敗契丹生擒首領  
三十人符習奏修隄役夫遇雪寒逃散樞密使郭崇韜  
上表辭兼鎮時帝命李紹斌鎮幽州以其時望未重欲  
以李嗣源爲鎮帥且爲紹斌聲援移郭崇韜兼領汴州  
召崇韜議之崇韜奏以爲當因懇辭兼領庚辰以宣武  
軍節度使李嗣源爲鎮州節度使辛巳以皇子繼潼繼  
嵩繼蟾繼曉並檢校司徒皆冲幼未出閣突厥渤海國  
皆遣使貢方物帝幸近郊射雁甲申以樞密使郭崇韜  
爲依前守侍中監修國史兼樞密使加食邑實封廣南

劉巖遣使奉書于帝稱大漢國王致書上大唐皇帝乙酉帝射鴨于郭泊丙戌定州節度使檢校太尉兼侍中王都進封開國公加食邑實封戊子幸近郊射雁工部尙書崔柅卒贈右僕射三月癸巳朔賜扈從諸軍將士優給自二十千至一千甲午振武軍節度使洛京內外蕃漢馬步使朱守殷奏昨修月陂隄至德宮南獲玉璽一紐獻之詔示百官驗其文曰皇帝行寶四字方圓八寸厚二寸背紐交龍光瑩精妙守殷又于役所得古文錢四百六十六內二十六文日得一元寶四百四十日順天元寶上之

案麗元英文昌雜錄云同光三年洛京積善坊得古文錢日得一元寶順天元



寶史不載何代鑄錢近見錢氏錢譜云史思明再陷洛陽鑄得一錢賊黨以謂得一非佳號乃改順天蓋史思明所鑄也

丙申寒食節帝與皇后出近郊遙饗代州親廟  
庚子詔取三月十七日車駕歸洛京壬寅符習奏修河隄畢功戊申帝召郭崇韜謂曰朕思在德勝寨時霍彥威段凝皆予之勅敵終日格鬪戰聲相聞安知二年之間在吾廡下吾無少康光武之才一旦重興基構者良由二三勲德同心輔翼故也朕有時夢寢如在戚城思念曩時挑戰鏖兵勞則勞矣然而揚旌伐鼓差慰人心殘壘荒溝依然在目予欲按德勝故寨與卿再陳舊事崇韜曰此去澶州不遠陛下再觀戰地益知王業之艱

難豈不難哉已酉車駕發鄴宮辛亥至德勝城

案五代春秋作

庚子帝幸鄴都遂幸德勝故城据薛史則已酉發鄴宮辛亥至德勝城與五代表春秋異蓋五代春秋祇以下詔之日為登城四望指戰陣之處以諭宰臣渡河南觀廢

柵舊址至楊村寨沁河至戚城置酒作樂而罷壬子淮

南楊溥遣使朝貢東京副留守張憲奏諸營家口一千

二百人逃亡以艱食故也時宮苑使王允平伶人景進

為帝廣採宮人不擇良家委巷殆千餘人車駕不給載

以牛車纍纍于路焉庚辰車駕至自鄴

案原本作庚辰歐陽史作庚申

疑永樂大典傳寫之訛考通鑑及五代春秋皆作庚辰又疑原本不誤据上文正月甲午朔二月甲子朔三月癸巳朔則三月不得有庚辰也蓋其誤始于薛史而通鑑五代春秋皆襲其訛耳今姑從原本仍為辨正于此

辛酉詔本朝以雍州爲西京洛州爲東都并州爲北都

近以魏州爲東京宜依舊以洛京爲東都魏州改爲鄴

都與北都並爲次府夏四月癸亥朔案五代春秋作卒亥朔通鑑從薛史

日有蝕之以租庸副使孔循權知汴州軍州事丙寅淮

南楊溥遣使貢方物壬申幸甘泉亭癸酉詔翰林學士

承旨盧質覆試新及第進士案五代會要時以新及第進士符蒙正等尙干浮議

故命盧質覆試租庸使奏時雨久愆請下諸道州府依法祈禱

從之乙亥帝與皇后幸郭崇韜第又幸左龍武統軍朱

漢賓之第戊寅以耀州爲團練州其順義軍額宜停庚

辰帝侍皇太后幸會節園遂幸李紹榮之第辛巳以旱

甚詔河南府徙市造五方龍集巫禱祭癸未以兗州節  
度使李紹欽爲鄧州節度使丁亥以鎮州節度使李嗣  
源兼北面水陸轉運使以徐州節度使李紹眞爲副禮  
部貢院新及第進士四人其王澈改爲第一桑維翰第  
二符蒙正第三成僚第四禮部侍郎裴皞旣無黜落時  
議寬容今後新及第人候過堂日委中書門下精加詳  
覆陝州奏木連理庚寅中書侍郎兼工部尙書平章事  
趙光胤卒廢朝三日五月壬辰朔淮南楊溥貢端午節  
物丁酉皇太妃劉氏薨于晉陽廢朝五日帝于興安殿  
行服時皇太后欲奔喪于晉陽百官上表請留乃止戊

戊以鎮州行軍司馬知軍府事任圜爲工部尙書戊申  
幸龍門廣化寺祈雨己酉黑水女貞皆遣使朝貢戊午  
以鳳州衙內馬步軍都指揮使李繼昶爲涇州節度使  
檢校太傅己未詔天下見禁罪人如無大過速令疎放  
幸玄元廟禱雨六月癸亥雲州上言去年契丹從磧北  
歸帳達靺因相掩擊其首領裕悅舊作于越  
今改正族帳自磧  
北以部族羊馬三萬來降已到南界今差使人來赴闕  
奏事甲子太白晝見丁卯以滄州節度使安元信充北  
面行營馬步軍都排陣使辛未以宗正卿李紆充昭宗  
少帝改卜園陵使壬申京師雨足自是大雨至于九月

晝夜陰晦未嘗澄霽江河漂溢隄防壞決天下皆訴水災丁丑詔吳越王錢鏐將行冊禮準禮文合用竹冊宜令所司修製玉冊時郭崇韜秉政以爲不可樞密承旨段回贊其事故有是命癸丑以天德軍節度使管內蕃漢都知兵馬使劉承訓爲天德軍節度觀察留後丙戌詔曰關內諸陵頃因喪亂例遭穿穴多未掩脩其下宮殿宇法物等各令奉陵州府據所管陵園修製仍四時各依舊例薦饗每陵仰差近陵百姓二十戶充陵戶以備灑掃其壽陵等一十陵亦一例修掩量置陵戶戊子以刑部尙書李琪充昭宗少帝改卜園陵禮儀使己丑

以工部郎中李途爲京兆少尹充修奉諸陵使辛卯詔

括天下私馬

案五代會要詔下河南河北諸州和市戰馬官吏除一匹外匿者坐罪蓋當時私馬

之禁

將收蜀故也

永樂大典卷七千一百五十七

舊五代史卷三十二終

舊五代史卷三十二攷證

巳酉車駕發鄴宮辛亥至德勝城 案五代春秋作庚子帝幸鄴都遂幸德勝故城據是書則巳酉發鄴宮辛亥至德勝城與五代春秋異蓋五代春秋祇以詔下之日爲據也

庚辰車駕至自鄴 庚辰歐陽史作庚申攷通鑑及五代春秋皆作庚辰據上文正月甲午朔二月甲子朔三月癸巳朔則三月不得有庚辰也蓋其誤始于是書而通鑑五代春秋皆襲其訛耳今姑從原本仍爲辨正于此



夏四月癸亥朔 案五代春秋作辛亥朔通鑑從是書  
中書侍郎兼工部尙書平章事趙光允卒 案是書二  
年六月光允加兼戶部尙書此處作工部前後互異  
未知孰是

安巴堅舊作阿保機今改 裕悅舊作于越今改

補許他人占射 五代會要載此詔云藩方侯伯內外臣僚于京邑之中無安居之所亦可請射

各自修營

舊五代史卷三十二攷證

舊五代史卷三十三

宋司空同中書門下平章事薛居正等撰

莊宗紀第七

唐書九

同光三年秋七月丁酉以久雨詔河南府依法祈晴滑  
州上言黃河決壬寅皇太后崩于長壽宮帝執喪于內  
出遺令以示于外癸卯帝于長壽宮成服百官于長壽  
宮幕次成服後于殿前立班奉慰乙巳宰臣上表請聽  
政不允表再上勅旨宜廢朝七日丁未弘文館上言請  
依六典改弘文館爲崇文館從之時樞密使郭崇韜亡  
父名弘豆盧革希崇韜指奏而改之

案五代會要載同  
光三年勅云崇文

館比與弘文館並置今請改稱願  
協舊典蓋豆盧革曲爲之說也

洛水泛漲壞天津橋

以舟濟渡日有覆溺者己酉宰臣百官上表請聽政又  
請復常膳表凡三上以刑部尚書李琪充大行皇太后  
山陵禮儀使河南尹張全義充山陵橋道排頓使孔謙  
充監護使壬子河陽陝州上言河溢岸以禮部尚書王  
正言爲戶部尚書以御史中丞崔協爲禮部尚書以刑  
部侍郎史館修撰判館事崔居儉爲御史中丞以尚書  
左丞歸藹爲刑部侍郎陝州上言河漲二丈二尺壞浮  
橋入城門居人有溺死者乙卯汴州上言汴水泛漲恐  
漂沒城池于州城東西權開壕口引水入古河澤潞上

言自今月一日雨至十九日未止戊午以刑部尙書判太常卿兼判吏部尙書銓事李琪爲吏部尙書依前判太常卿以兵部侍郎集賢殿學士判院事盧文紀爲吏部侍郎以給事中李光序爲尙書右丞許州滑州奏大水八月壬戌詔諸司人吏不許諸處奏薦如有勞績只許本司奉聞詔有司吳越王印宜以黃金鑄成其文曰吳越國王之印丁卯帝釋服百官奉慰于長壽宮戊辰客省使李巖使蜀回初帝令往市蜀中珍玩蜀法巖峻不許奇貨東出其許市者謂之入草物巖不獲珍貨歸而奏之帝大怒曰物歸中夏者命之曰入草王衍甯免

爲入草之人耶由是伐蜀之意銳矣庚辰幸壽安山陵  
作所鄴都大水御河泛濫癸未河南縣令羅貫長流崖  
州尋委河南府決痛杖一頓處死坐部內橋道不修故  
也及死人皆寃之甲申山陵禮儀使奏山陵封域之內  
先有巨墳合令子孫改卜舊例給其所費無子孫者官  
爲瘞藏如是五品以上官所司仍以禮致祭從之鳳翔  
奏大水已酉中書門下上言據禮儀使狀準故事太常  
少卿定大行太后諡議太常卿署定訖告天地宗廟伏  
準禮文賤不得誅貴子不得爵母后必諡于廟者受成  
于祖宗今大行太后諡請太常卿署定後集百官連署

謚狀訖讀于太廟太祖皇帝室然後差丞郎一人撰冊  
文別定日命太尉上謚冊于西宮靈座同日差官告天  
地太微宮宗廟如常告之儀從之青州大水蝗已丑以  
襄州留後李紹珙爲襄州節度使以邠州留後董璋爲  
邠州節度使九月辛卯朔河陽奏黃河漲一丈五尺癸  
巳中書上言大行皇太后謚議合讀于太廟太祖室其  
日集兩省御史臺五品已上尙書省四品已上諸司三  
品已上官于太廟序立從之鎮州衛州奏水入城壞廬  
舍乙未制封第三子鄴都留守興聖宮使檢校太尉同  
平章事判六軍諸衛事繼岌爲魏王幸壽安陵庚子襄

州奏漢江漲溢漂溺廬舍是日命大舉伐蜀詔曰朕夙  
荷丕基乍平僞室非不欲寵綏四海協和萬邦庶正朔  
以遐同俾人倫之有序其或地居陬裔位極驕奢殊乖  
事大之規但蘊偷安之計則必徵諸典訓振以皇威爰  
興伐罪之師冀遏亂常之黨蠢茲蜀主世負唐恩間者  
父總藩宣任居統制屬朱溫東離汴水致昭皇西幸岐  
陽不務扶持反懷願望盜據劍南之土宇全虧閩外之  
忱誠先皇帝早在并門將興霸業彼旣會馳書幣此亦  
復展謝儀後又特發使人專持聘禮彼則更不廻一介  
之使答咫尺之書星歲俄移歡盟頓阻朕頃遵遺訓嗣

統列藩追昔日之來誠繼先皇之舊好累馳信幣皆絕  
酬還背惠食言棄同卽異今觀孽豎紹據山河委闕宦  
以持權憑阻修而僭號早者曾上秦王緘札張皇蜀地  
聲塵形侮黷之言辭謗親賢之勲德昨朕風驅銳旅電  
掃兇渠復已墜之宗祧續中興之曆數捷音旋報復命  
仍稽使來而尙抗書題情動而先誇險固加以宋光葆  
輒陳狂計別啟奸媒將欲北顧秦川東窺荆渚人而無  
禮罪莫大焉昨客省使李巖奉使銅梁近歸金闕凡于  
奏對備述端由其宋光嗣相見之時于坐上便有言說  
先問契丹強弱次數秦王是非度此苞藏可見情狀加



以疎遠忠直朋比奸雄內則縱恣輕華競貪寵位外則  
滋彰法令蠹耗生靈旣德力以不量在神祇之共憤今  
命興聖宮使魏王繼岌充西川四面行營都統命侍中  
樞密使郭崇韜充西川東北面行營都招討制置等使  
荆南節度使高季興充西川東南面行營都招討使鳳  
翔節度使李勣充供軍轉運應接等使同州節度使季  
令德充行營招討副使陝府節度使李紹琛充行營蕃  
漢馬步軍都排陣斬斫使西京留守張筠充西川管內  
安撫應接使華州節度使毛璋充行營左廂馬步都虞  
候邠州節度使董璋充行營右廂馬步都虞候客省使

李巖充西川管內招撫使總領闕下諸軍兼四面諸道馬步兵事取九月十八日進發凡爾中外宜體朕懷辛丑授魏王繼岌諸道行營都統餘如故繼岌既受都統之命以梁漢駟充中軍馬步都虞候兼馬步軍都指揮使張廷蘊爲中軍步軍都指揮使牛景章充中軍左廂馬軍都指揮使沈斌充中軍右廂馬軍都指揮使卓瓌充中軍左廂步軍都指揮使王贄充中軍右廂步軍都指揮使供奉官李從襲充中軍馬步軍都監高品李廷安呂使柔充魏王衙通謁詔工部尙書任圜翰林學士李愚叅魏王軍事丁未夕徧天陰雲北方有聲如雷野

雉皆鳴俗所謂天狗落戊申魏王繼岌樞密使侍中郭

崇韜進發西征

案原本衍辛巳幸壽安陵甲寅八字今刪去

太子少師致仕

薛廷珪卒贈右僕射甲寅幸壽安陵司天上言自七月  
三日大雨至九月十八日後方晴三辰行度不見丁巳  
幸尖山射雁冬十月庚申朔宰臣及文武三品以上官  
赴長壽宮上大行皇太后諡曰貞簡皇太后辛酉幸甘  
泉遂幸壽安陵壬戌魏王繼岌率師至鳳朔先遣使馳  
檄以諭蜀部丁卯奉皇太后尊諡寶冊赴西宮靈座宰  
臣豆盧革攝太尉讀冊文吏部尚書李琪讀寶文百官  
素服班于長壽宮門外奉慰淮南楊溥遣使進慰禮已

已中書上言貞簡太后陵請以坤陵為名從之初卜山

陵帝欲附于代州武皇陵奏議天子以四海為家不當

分其南北乃于壽安縣界別卜是陵案五代會要載中書門下奏議云人

君以四海為家不當分其南北洛陽是帝王之宅四時

朝拜禮須便近不能遠幸代州今漢朝諸陵皆近秦雍

國朝陵寢布列京畿後魏文帝自代遷洛之後園陵皆

在河南兼勅功臣之家不許北葬今魏氏諸陵尚在京

畿附葬代州理未為允從之 丙子以前翰林學士戶部侍郎馮道依

前本官充職戊寅西征之師入大散關九國志趙廷隱傳云自入敵境

即禁兵士焚廬舍 剽財物蜀人德之 偽命鳳州節度使王承捷故鎮屯駐 指揮使唐景思次第迎降得兵一萬二千軍儲四十萬 又下三泉得軍儲三十餘萬自是師無匱乏軍聲大振

通鑑卷之三十三 卷之三十三 六

辛巳僞興州刺史王承鑑成州刺史王承朴棄城遁去  
康延孝大破蜀軍于三泉時王衍將幸秦州以其軍五  
萬屯于利州聞我師至遣步騎三萬逆戰于三泉延孝  
與李巖以勁騎三千擊之蜀軍大敗斬首五千級餘眾  
奔潰王衍聞敗自利州奔歸成都斷吉柏津浮梁而去  
丁亥文武百官上表以貞簡皇太后靈駕發引請車駕  
不至山陵所戊子葬貞簡太后于坤陵己丑魏王繼岌  
至興州僞東川節度使宋光葆以梓綿劍龍普五州來  
降武定軍使王承肇以達蓬璧三州來降興元節度使  
王宗威以梁開通渠麟五州來降階州刺史王承岳納

符印請命秦州節度使王承休棄城自扶州路奔于西

川太平廣記引王氏見聞記云王承休握銳兵于天水

幼萬餘口金銀繒帛于西蕃買路歸蜀沿路爲西蕃擄

奪凍餓相踐而死迨至蜀存者百餘人唯與田宗汭等

脫身而至魏王使人問之曰親握重兵何得不戰曰畏

大王神武不敢當其鋒曰何不早降曰蓋緣王師不入

封部無門納款曰初入蕃部幾許人曰萬餘口今存者

幾何曰纔及百數魏王曰汝可償萬人之命遂斬之

十一月庚寅朔帝幸壽安號慟于坤陵戊戌以振武節

度使朱守殷爲兗州節度使徐州鄴都上言十月二十

五日夜地大震康延孝至利州修吉柏津浮梁僞昭武

軍節度使林思謬來降辛丑魏王過利州帝賜王衍詔

論以禍福甲辰魏王至劍州僞武信軍節度使王宗壽

論以禍福甲辰魏王至劍州僞武信軍節度使王宗壽

以遂合渝瀘忠五州來降

案九國志王宗壽傳王衍時爲武信軍節度使唐師入境

郭崇韜遣使遺宗壽書宗壽不納聞衍降乃治裝赴丁

未高麗國遣使貢方物康延孝李嚴至漢州王衍遣人

送牛酒請降李嚴遂先入成都戊申耐貞簡皇太后神

主于太廟己酉魏王至綿州王衍遣使上牋歸命庚戌

皇弟鄆州節度使存霸滑州節度使存渥左金吾大將

軍晉州節度使存乂邢州節度使存紀並授起復雲麾

將軍右金吾大將軍同正荆南節度使高季興奏收復

歸夔忠等州辛亥魏王至德陽僞六軍使王宗弼報王

衍舉家遷于西宅宗弼權稱西川兵馬留後又報僞樞

密使宋光嗣景潤澄宣徽使李周輅歐陽晃同有異謀

惑亂蜀主已梟斬訖

案九國志王宗弼傳唐師陷鳳州行遣三招討屯三泉以拒唐師未

戰三招討俱遁走因令宗弼守綿谷而誅三招討宗弼

遂與三招討同送款于魏王乃還成都斬宋光嗣等函

首送于魏王遷衍及母妻于西宮通鑑作李

嚴至成都宗弼猶乘城為守備與九國志異王子王衍

遣使上表請降癸丑以吳越國馬步統軍使檢校太傅

錢元球為檢校太尉守侍中充靜海軍節度使乙卯魏

王至西川城北丙辰蜀主王衍出降語在衍傳

案王衍出降在

十一月丙辰通鑑與薛史同歐陽史作己酉蓋據其上

牋歸命之日而失書之其寔己酉唐師尚在綿州未入

成都也五代春秋作十丁巳大軍入成都法令嚴峻市

二月蜀王衍降尤誤

不易肆自興師凡七十五日蜀平得兵士三萬兵仗七



百萬糧二百五十二萬錢一百九十二萬貫金銀共二  
十二萬兩珠玉犀象二萬紋錦綾羅五十萬得節度州  
十郡六十四縣二百四十九已丑禮儀使奏貞簡皇太  
后升祔禮畢一應宗廟伎樂及諸祀並請仍舊從之十  
二月壬戌以前雲州節度使李存敬爲同州節度使以  
同州節度使檢校太保同平章事李合德爲遂州節度  
使以邠州節度使檢校太保董璋爲劍南東川節度副  
大使知節度事以華州節度使毛璋爲邠州節度使以  
左金吾大將軍史敬鎔爲華州節度使丁卯以武甯軍  
節度副使李紹文爲兗州觀察留後庚午宴諸王武臣

于長春殿始用樂丙子以北京副留守事太原尹孟知祥爲檢校太傅同平章事成都尹劍南西川節度副大使知節度事西山八國雲南都招撫等使以戶部尙書王正言爲檢校吏部尙書守興唐尹充鄴都副留守以鄴都副留守興唐尹張憲檢校吏部尙書太原尹充北京副留守知留守事己卯以臘辰狩于白沙皇后皇子宮人畢從庚辰次伊闕辛巳次潭泊壬寅次龕澗癸未還宮是時大雪苦寒吏士有凍踣于路者伊汝之民飢乏尤甚衛兵所至責其供餉旣不能給因壞其什器撤其廬舍而焚之甚于剽劫縣吏畏恐竄避于山谷間甲

申出御札示中書門下以今歲水災異常所在人戶流徙以避征賦鬪市之征抽納繁碎宜令宰臣商量條奏丙戌第三姑宋氏封義甯大長公主長姊孟氏封瓊華長公主第十一妹張氏封瑤英長公主十二月甲午賜中書門下詔曰朕聞古先哲王臨御天下上則以無偏無黨爲至治次則以足食足兵爲遠謀緬維前修誠可師範朕纂承鳳曆嗣守鴻圖三載于茲萬機是總非不知五兵未弭兆庶多艱蓋賴卿等寅亮居懷康濟爲務冀盡敷輿之理洞詢盍徹之規今則潛案方區備聆諡俗或力役罕均其勞逸或賦租莫辨于後先但以督促

爲名煩苛不已被甲冑者何嘗充給趨朝省者轉困支  
持州閭之貨殖全踈天地之災祥屢應以至星辰越度  
旱澇不時農桑失業于上園道殣相望于郊野生靈及  
此寢食甯遑豈非朕德政未孚焦勞自拙者耶朕昨親  
援毫翰軫念瘡痍一則詢爾謀猷一則表予宵旰未被  
來奏轉撓于懷敢不翼翼罪躬乾乾軫慮咨爾四岳弼  
予一人何不舉賢才裨寡昧百辟之內羣后之間莫不  
有盡忠者被掩其能抱器者艱陳其力或草澤有遺逸  
之士山林多屈滯之人爾所不知吾將安訪卿等位尊  
調鼎名顯代天旣逢不諱之朝何恡由衷之說當宜歷

告中外急訪英髦應在仕及前資文武官已下至草澤之士有濟國治民除姦革弊者並宜各獻封章朕當選擇施行其近宣御札亦告諭內外體朕意焉是時兩河大水戶口流亡者十四五都下供饋不充軍士乏食乃有鬻子去妻老弱採拾于野殍踣於行路者州郡飛輓旋給京師租庸使孔謙日于上東門外伫望其來算而給之加以所在泥潦輦運艱難愁嘆之聲盈于道路四方地震天象乖越帝深憂之問所司濟贍之術孔謙比以吏進故無保邦濟民之要務唯以急刻賦歛爲事樞密承旨段徊奏曰臣見本朝時或遇歲時災歉國費不

足天子將求經濟之要則內出朱書御札以訪宰臣請  
陛下依此故事行之卽命學士草詞帝親札以訪宰臣  
非帝憂民之實也時宰相豆盧革等依阿徇旨竟無所  
陳但云陛下威德冠天下今西蜀平定珍寶甚多可以  
給軍水旱作沴天之常道不足以貽聖憂中官李紹宏  
奏曰侯魏王旋軍之後若兵額漸多饋輓難給請且幸  
汴州以便漕輓時羣臣獻議者亦多大較詞理迂闊不  
中時病唯吏部尙書李琪引古田租之法從權救弊之  
道上疏言之帝優詔以獎之丁酉詔僞蜀私署官員等  
惟名與器不可假人况是遐僻偏方僭竊僞署因時亂

而濫稱名位歸國體而悉合削除但恐當本朝屯否之時有歷代簪纓之士既陷彼土遂授僞官又慮有曾受本朝渥恩當時已居班秩須爲升降不可通同應僞署官至太師太傅及三少并太尉司徒司空侍中中書令左右僕射已上並宜降至六尚書臨時更約僞署高低爲六行次第階至開府特進金紫者宜令文班降至朝散大夫武班降至銀青爵僞署將相已下與開國男餘並不得更請封爵其有功臣削去

臣名號並宜削去

如是僞署節鎮伐罪之初率先向化及立功

案此句疑有脫誤据五代會要作其有功

効者宜委繼岌崇韜臨時獎任其刺史但許稱使君不

得更有檢校官其僞署班行正四品已上酌此降黜五  
品以下如不曾經本朝授官若材智有聞卽許于府縣  
中量材任使如無材智可錄止是蜀地土人並宜放歸  
田里如是西班有稱統軍上將軍者若是本朝功臣子  
孫及將相之嗣並據人材高下與諸衛小將軍府率中  
郎將次第授任如是小將軍已下據人材堪任使者宜  
委西川節度使衙前補押衙不堪任使者亦宜放歸田  
里應已前降官除軍前量事迹任使外餘並稱前銜候  
朝廷續據才行任使庚子彰武保大等節度使高萬興  
卒甲辰淮南楊溥遣使朝貢乙巳以晉州節度使李存



又爲鄜州節度使以相州刺史李存確爲晉州節度使

丙午兩省諫官上疏請車駕不巡幸汴州凡三上章乃

允庚戌魏王繼岌奏遣秦州副使徐藹賫書招諭南詔

蠻又奏點到兩川馬九千五百三十匹清異錄莊宗滅梁平蜀志頗自

逸命蜀匠織十幅無縫錦爲被材被成賜名六合被辛亥制皇第二弟存霸可封

永王第三弟存美可封邕王第四弟存渥可封申王第

五弟存乂可封睦王第六弟存確可封通王第七弟存

紀可封雅王是歲日傍有背氣凡十三永樂大典卷七千一百五十七

舊五代史卷三十三終

舊五代史卷三十三攷證

唐莊宗紀七禮部尙書王正言 正言原本作直言今

據歐陽史改正

其許市者謂之入草物 入草原本訛全草今據通鑑

及冊府元龜所引薛史改正

鎮州衛州奏 案原本脫鎮州二字今據冊府元龜所

引薛史增入

太子少師致仕薛廷珪卒 少師原本作少保今據列

傳改正

斷吉柏津 吉柏通鑑作桔柏攷歐陽史亦作吉柏今

仍其舊

梁僞昭武軍節度使林思謬來降 思謬原本作世謬

今據通鑑十國春秋改正

僞武信軍節度使王宗壽以遂合渝瀘忠五州來降

案九國志王宗壽傳唐師入境郭崇韜遣使遺宗壽書宗壽不納聞衍降乃治裝赴闕歐陽史蜀世家亦言宗壽獨不降聞衍已銜璧大慟從衍東遷據是書則王衍未送款宗壽已降疑傳聞之誤

丙辰蜀主王衍出降 案王衍出降在十一月丙辰通

鑑與是書同歐陽史作己酉蓋據上牋歸命而先書

之其實已酉唐師尙在綿州未入成都也五代春秋  
作十二月蜀王衍降尤誤

辛巳次潭泊壬午次龕澗 潭泊原本訛覃泊龕澗原  
本訛寵澗今並從通鑑改正

長姊孟氏封瓊華長公主 案通鑑以瓊華爲克讓女  
則莊宗之從姊也隆平集東都事畧孟昶傳並云父  
知祥尙唐莊宗妹俱與是書異

日于上東門外伫望其來 上東門原本作尙東門據  
通鑑注云洛城東面三門中日建春左日上東右日  
永春今改正

如是西班有稱統軍上將軍者 西班原本作兩班今  
據五代會要改正

第七弟存紀可封雅王 雅王原本作睢王攷通鑑及  
歐陽史皆作雅王是書宗室傳亦作雅今改正

舊五代史卷三十三攷證

舊五代史卷三十四

宋司空同中書門下平章事薛居正等撰

莊宗紀第八

唐書十

同光四年春正月戊午朔帝不受朝賀契丹寇渤海壬戌詔以去歲災沴物價騰涌自今日三日後避正殿減膳撤樂以答天譴應去年遭水災州縣秋夏稅賦並與放免自壬午年已前所欠殘稅及諸色課利已有勅命放免者尙聞所在却有徵收宜令租庸司切準前勅處分應京畿內人戶有停貯斛斗者並令減價出糶如不遵行當令檢括西川王衍父子及僞署將相官吏除已

行刑憲外一切釋放天下禁囚除十惡五逆官典犯脏  
屠牛毀錢放火劫舍持刀殺人準律常赦不原外應合  
抵極刑者遞降一等其餘罪犯悉與減降逃背軍健並  
放逐便癸亥河中節度使李繼麟來朝諸州上言準宣  
爲去年十月地震集僧道起消災道場甲子魏王繼岌  
殺樞密使郭崇韜于西川夷其族丙寅百官上表請復  
帝膳凡三上表乃允之西川行營都監李廷安進西川  
樂官二百九十八人契丹寇女真渤海戊寅契丹案巴  
堅舊作阿保  
機今改正遣使貢良馬庚辰帝異母弟鄜州節度使  
存乂伏誅存乂郭崇韜之子壻也故亦及于禍是日以

河中節度使守太師兼尙書令西平王李繼麟爲滑州節度使尋令朱守殷以兵圍其第誅之夷其族辛巳吐渾奚各遣使貢馬鎮州上言部民凍死者七千二百六十人又奏準宣進花菓樹栽及抽樂人梅審鐸赴京甲申以鄆州節度使永王存霸爲河中節度使以滑州節度使申王存渥爲鄆州節度使乙酉內人景姪上言昭宗遇難之時皇屬千餘人同時遇害爲三穴瘞于宮城西古龍興寺北請改葬從之仍詔河南府監護其事丙戌廻鶻可汗阿咄欲遣使貢良馬鎮州上言平棘等四縣部民餓死者二千五百人丁亥詔朱友謙同惡人史



武等七人已當國法並籍沒家產武等友謙舊將時皆

為刺史並以無罪族誅

案通鑑云友謙舊將史武等七人時為刺史皆坐族誅蓋以薛

史為據于七人姓名不為全載考歐陽史丁亥殺繼麟之將史武薛容周唐殷揚師太王景來仁白奉國可補薛史之所未備二月己丑以宣徽南院使知內侍省兼內勾特

進右領軍衛上將軍李紹宏為驃騎大將軍守武衛上

將軍知內侍省充樞密使甲午以鄭州刺史李紹奇為

河陽節度使以樂人景進為銀青光祿大夫檢校右散

騎常侍守御史大夫進以俳優嬖幸善采訪閭巷鄙細

事以啓奏復密求妓媵以進恩寵特厚魏州錢穀諸務

及招兵市馬悉委進監臨孔謙附之以希寵常呼為八

哥諸軍左右無不托附至于士人亦有因之而求仕進者每入言事左右紛然屏退惟以陷害熒惑爲意焉是日帝幸冷泉校獵乙未宰臣豆盧革上言請支州縣官實俸以責課効丙申武德使史彥瓊自鄴馳報稱今月六日貝州屯駐兵士突入都城剽劫坊市初帝令魏博指揮使楊仁晟率兵戍瓦橋至是代歸有詔令駐于貝州上歲天下大水十月鄴地大震自是居人或有亡去他郡者每日族談巷語云城將亂矣人人恐悚皆不自安十二月以戶部尙書王正言爲興唐尹知留守事正言年耄風病事多忽忘比無經治之才武德使史彥瓊

者以伶官得幸帝待以腹心之任都府之中威福自我  
正言以下皆脅肩低首曲事不暇由是政無統攝姦人  
得以窺圖值郭崇韜伏誅人未測其禍始皆云崇韜已  
殺繼岌自王西川故盡誅郭氏先是有密詔令史彥瓊  
殺朱友謙之子澶州刺史建徽彥瓊夜半出城不言所  
往詰旦闔報正言曰史武德夜半馳馬而去不知何往  
是日人情震駭訛言云劉皇后以繼岌死于蜀已行弑  
逆帝已晏駕故急徵彥瓊其言播于鄴市貝州軍士有  
私甯親于都下者掠此言傳于貝州軍士皇甫暉等因  
夜聚蒲博不勝遂作亂劫都將楊仁晟曰我輩十有餘

年爲國家効命甲不離體已至吞併天下主上未垂恩澤翻有猜嫌防戍邊遠經年離阻鄉國及得代歸去家咫尺不令與家屬相見今聞皇后弑逆京邑已亂將士各欲歸府甯親請公同行仁最曰汝等何謀之過耶今英主在上天下一家從駕精兵不下百萬西平巴蜀威振華夷公等各有家族何事如此軍人乃抽戈露刃環仁最曰三軍怨怒咸欲謀反苟不聽從須至無禮仁最曰吾非不知此但丈夫舉事須計萬全軍人卽斬仁最裨將趙在禮聞軍亂衣不及帶將踰垣而遁亂兵追及白刃環之曰公能爲帥否則則頭隨刃落在禮懼卽曰

吾能爲之眾遂呼譟中夜燔劫貝郡詰旦擁在禮趨臨  
清剽永濟館陶五日晚有自貝州來者言亂兵將犯都  
城都巡檢使孫鐸等急趨史彥瓊之第告曰賊將至矣  
請給鎧仗登陴拒守彥瓊曰今日賊至臨清計程六日  
方至爲備未晚孫鐸曰賊來寇我必倍道兼行一朝失  
機悔將何及請僕射率眾登陴鐸以勁兵千人伏于王  
莽河逆擊之賊旣挫勢須至離潰然後可以剪除如俟  
其凶徒薄于城下必慮奸人內應則事未可測也彥瓊  
曰但訓士守城何須卽戰時彥瓊疑孫鐸等有他志故  
拒之是夜三更賊果攻北門彥瓊時以部眾在北門樓

聞賊呼譟卽時驚潰彥瓊單騎奔京師遲明亂軍入城  
孫鐸與之巷戰不勝携其母自水門而出獲免晡晚趙

在禮引諸軍據宮城署皇甫暉趙進等為都虞候斬斫

使案九國志趙進傳云莊宗入洛猶行遣屯廩祿既薄  
又不時給士卒多怨憤思亂者十七同光末進與本

軍皇甫暉等共推趙在禮相率夜犯鄴城鄴中士卒莫

有鬪志進等因陷其城未踰旬兵數萬在禮署進衙內

都虞三城巡檢使通鑑作趙在禮據宮城署皇甫  
暉及軍校趙進為馬步都指揮使與九國志異 諸軍

大掠興唐尹王正言謁在禮望塵再拜是日眾推在禮

為兵馬留後草奏以聞帝怒命宋州節度使元行欽率

騎三千赴鄴都招撫詔徵諸道之師進討丁酉淮南楊  
溥遣使賀平蜀已亥魏王繼岌奏康延孝擁眾反廻寇

西川遣副招討使任圜率兵追討之庚子福建節度副使王廷翰奏節度使王審知委權知軍府事邢州左右步直軍四百人據城叛推軍校趙太爲留後詔東北面副招討使李紹眞率兵討之辛丑元行欽至鄴都進攻南門以詔書招諭城中趙在禮獻羊酒勞軍登城遙拜行欽曰將士經年離隔父母不取勅旨歸甯上貽聖憂追悔何及儻公善爲敷奏俾從渙汗某等亦不敢不改過自新行欽曰上以汝輩有社稷功必行赦宥因以詔書諭之皇甫暉聚眾大詬卽壞詔行欽以聞帝怒曰收城之日勿遺噍類壬寅行欽自鄴退軍保澶州甲辰從

馬直宿衛軍士王温等五人夜半謀亂殺本軍使爲衛  
兵所擒磔于本軍之門丙午以右散騎常侍韓彥憚爲  
戶部侍郎丁未鄴都行營招撫使元行欽率諸道之師  
再攻鄴都戊申以洋州留後李紹文爲夔州節度使詔  
河中節度使永王存霸歸藩己酉以樞密使宋唐玉爲  
特進左威衛上將軍充宣徽南院使庚戌諸軍大集于  
鄴都進攻其城不克行欽又大治攻具城中知其無救  
晝夜爲備朝廷聞之益恐連發中使促繼岌西征之師  
繼岌以康延孝據漢州中軍之士從任圜進討繼岌端  
居利州不獲東歸是日飛龍使顏思威部署西川宮人



至辛亥淮南楊溥遣使貢方物西京上言客省使李嚴  
押蜀主王衍至本府王子以守太尉中書令河南尹兼  
河陽節度使齊王張全義爲檢校太師兼尙書令充許  
州節度使東川董璋奏準詔誅遂州節度使李合德于  
本州夷其族癸丑湖南馬殷奏福建節度使王審知疾  
甚副使王延翰已權知軍府事請降旌節司天監上言  
自二月上旬後晝夜陰雲不見天象自二十六日方晴  
至月終星辰無變以右衛上將軍朱漢賓知河南府事  
甲辰命蕃漢總管李嗣源統親軍赴鄴都以討趙在禮  
帝素倚愛元行欽鄴都軍亂卽命爲行營招討使久而

無功時趙太據邢州王景戡據滄州自爲留後河朔郡  
邑多殺長吏帝欲親征樞密使與宰臣奏言京師者天  
下根本雖四方有變陛下宜居中以制之但命將出征  
無煩躬御士伍帝曰紹榮討亂未有成功繼岌之軍尙  
留巴漢餘無可將者斷在自行樞密使李紹宏等奏曰  
陛下以謀臣猛將取天下今一州之亂而云無可將者  
何也總管李嗣源是陛下宗臣創業以來艱難百戰何  
城不下何賊不平威略之名振于夷夏以臣等籌之若  
委以專征鄴城之寇不足平也帝素寬大容納無疑于  
物自誅郭崇韜朱友謙之後闡宦伶官交相讒諂邦國

大事皆聽其謀繇是漸多猜惑不欲大臣典兵既聞奏  
議乃曰予恃嗣源侍衛卿當擇其次者又奏曰以臣等  
料之非嗣源不可河南尹張全義亦奏云河朔多事久  
則患生宜令總管進兵如倚李紹榮輩未見其功帝乃  
命嗣源行營是日延州知州白彥琛奏綏銀兵士剽州  
城謀叛魏王繼岌傳送郭崇韜父子首函至闕下詔張  
全義收瘞之乙巳以右武衛上將軍李肅爲安邑解縣  
兩池榷鹽使以吏部尙書李琪爲國計使三月丁未朔  
案通鑑作丁巳朔與薛史異李紹真奏收復邢州擒賊首趙太等二  
十一人狗于鄴都城下皆磔于軍門庚戌李紹真自邢

州赴鄴都城下

案通鑑作庚申李紹真引兵至鄴都營于城西北以太等狗于鄴城下而殺之

與薛史異

辛亥以威武軍節度副使福建管内都指揮使檢

校太傅守江州刺史王延翰爲福建節度使依前檢校太傅王子李嗣源領軍至鄴都營于西南隅甲寅進營于觀音門外下令諸軍詰旦攻城是夜城下亂軍迫嗣源爲帝遲明亂軍擁嗣源及霍彥威入于鄴城復爲皇甫暉等所脅嗣源以詭詞得出夜分至魏縣時嗣源遙領鎮州詰旦議欲歸藩上章請罪安重誨以爲不可語在明宗紀中翌日遂次于相州元行欽部下兵退保衛州以飛語上奏嗣源一日之中遣使上章申理者數四

帝遣嗣源子從審

案從審歐陽史作從璟考通鑑從審自衛州歸莊宗賜名繼璟與歐陽史

異

與中使白從訓賁詔以諭嗣源行至衛州從審爲元

行欽所械不得達是日西面行營副招討使任圜奏收復漢州擒逆賊康延孝丙辰荆南高季興上言請割峽內夔忠萬等三州却歸當道依舊管係又請雲安監初將議伐蜀詔高季興令率本軍上峽自收元管屬郡軍未進夔忠萬三州已降季興數請之因賂劉皇后及宰臣樞密使內外叶附乃俞其請戊午詔河南府預借今年秋夏租稅時年飢民困百姓不勝其酷京畿之民多號泣于路議者以爲劉益子復生矣庚申詔潞州節度

使孔勅赴闕以右龍虎統軍安崇阮權知潞州是日忠武軍節度使齊王張全義薨壬戌宰臣豆盧革率百官上表以魏博軍變請出內府金帛優給將士不報時知星者上言客星犯天庫宜散府藏又云流星犯天棊主御前有急兵帝召宰臣于便殿皇后出宮中妝奩銀盆各二并皇子滿哥三人謂宰臣曰外人謂內府金寶無數向者諸侯貢獻旋供賜與今宮中有者粧奩嬰孺而已可驚之給軍革等惶恐而退癸亥以僞置昭武軍節度使林思謬爲閩州刺史是日出錢帛給賜諸軍兩樞密使及宋唐玉景進等各貢助軍錢幣是時軍士之家

乏食婦女掘蔬于野及優給軍人皆負物而詬曰吾妻子已殍矣用此奚爲甲子元行欽自衛州率部下兵士歸帝幸耀店以勞之西川輦運金銀四十萬至闕分給將士有差元行欽請車駕幸汴州帝將發京師遣中官向延嗣馳詔所在誅蜀主王衍仍夷其族乙丑車駕發京師戊辰遣元行欽將騎軍沿河東向壬申帝至滎澤以龍驤馬軍八百騎爲前軍遣姚彥溫董之彥溫行至中牟率所部奔于汴州時潘環守王村寨有積粟數萬亦奔汴州是時李嗣源已入于汴帝聞諸軍離散精神沮喪至萬勝鎮卽命旋師登路旁荒塚置酒視諸將流涕

俄有野人進雉因問塚名對曰里人相傳爲愁臺帝彌  
不悅罷酒而去是夜次汜水初帝東出關從駕兵二萬  
五千及復至汜水已失萬餘騎乃留秦州都指揮使張  
瑋以步騎三千守關帝過鬻子谷道路險狹每遇衛士  
執兵仗者皆善言撫之曰適報魏王繼岌又進納西川  
金銀五十萬到京當盡給爾等軍士對曰陛下賜與太  
晚今亦不感聖恩帝流涕而已又索袍帶賜從官內庫  
使張容哥對曰頒給已盡衛士叱容哥曰致吾君社稷  
不保是此闖豎抽刀逐之或救而獲免容哥謂同黨曰  
皇后惜物不散軍人歸罪于吾輩事若不測吾輩萬段



願不見此禍因投河而死

隆平集內臣李承進達事唐莊宗太祖嘗問莊宗時事對

日莊宗好畋獵每次近郊衛士必控馬首曰兒郎輩寒

冷望陛下與救接莊宗隨所欲給之如此者非一晚年

蕭墻之禍由賞賚無節威令不行也太祖歎曰二

十年夾河戰爭不能以軍法約束此輩誠兒戲

次石橋

案通鑑作甲申次石橋西與薛史異歐陽史作甲戌至自萬勝與薛史合

帝置酒野

次悲啼不樂謂元行欽等諸將曰鄴下亂離寇盜蜂起

總管迫于亂軍存亡未測今訛言紛擾朕實無聊卿等

事余以來富貴急難無不共之今茲危蹙賴爾籌謀而

竟默默無言坐觀成敗予在滎澤之日欲單騎渡河訪

求總管面為方略招撫亂軍卿等各吐胸襟共陳利害

今日俾予至此卿等如何元行欽等百餘人垂泣而奏

曰臣本小人蒙陛下撫養位極將相危難之時不能立功報主雖死無以塞責乞申後效以報國恩于是百餘人皆拔刀截髮置髻于地以斷首自誓上下無不悲號識者以爲不祥是日西京留守張筠部署西征兵士到京見于上東門外晡晚帝還宮初帝在汜水衛兵散走京師恐駭不甯及帝至人情稍安乙亥百官進名起居安義節度使孔勅奏點校兵士防城準詔運糧萬石進發次時勅已殺監軍使據城詭奏也丙子樞密使李紹宏與宰相豆盧革韋說會于中興殿之廊下商議軍機因奏魏王西征兵士將至車駕且宜控汜水以俟魏王

從之午時帝出上東門親閱騎軍誠以詰旦東幸申時

還宮四月丁丑朔

案歐陽史及通鑑五代春秋俱作四月丁亥朔考遼史天顯元年即同光

四年亦作四月丁亥朔唯薛史作丁丑與諸書異案是年正月係戊午朔三月係丁未朔則四月朔日自當爲丁丑蓋薛當時之寔錄其月日有可徵信也以永王存霸爲北都留守申王

存渥爲河中節度使是日駕將發京師從駕馬軍陳于

寬仁門外步兵陳于五鳳門外帝內殿食次從馬直指

揮使郭從謙自本營率所部抽戈露刃至興教門大呼

與黃甲兩軍引弓射興教門帝聞其變自宮中率諸王

近衛禦之逐亂兵出門旣而焚興教門緣城而入登宮

牆謹諫帝御親軍格鬪殺亂兵數百俄而帝爲流矢所

中亭午崩于絳霄殿之廡下時年四十二

琬玖集載宋實錄王全斌

傳云同光末蕭墻有變亂兵逼宮城近臣宿將皆釋甲潛遁惟全斌與符彥卿等十數人居中拒戰莊宗中流矢扶掖歸絳霄殿全斌慟哭而去東都事略符彥卿傳云郭從謙之亂莊宗左右皆引去惟彥卿力戰殺十餘人莊宗崩彥卿慟哭而去是時帝之左右例皆奔散唯五坊人善友

歛廊下樂器簇于帝屍之上發火焚之及明宗入洛止

得其燼骨而已天成元年七月丁卯有司上諡日光聖

神閔孝皇帝廟號莊宗是月丙子葬于雍陵

永樂大典卷七千一

百五十八 五代史補莊宗之嗣位也志在渡河但恨河東地狹兵少思欲百練其眾以取必勝于天下乃下令曰凡出師騎軍不見賊不許騎馬或步騎前後已定不得越軍分以避險惡其分路並進期會有處不得違晷刻并在路敢言病者皆斬之故三軍懼怯而戮力皆一以當百故朱梁舉天下而不能禦卒為所滅良有以

也初莊宗爲公子雅好音律又能自撰曲子詞其後凡  
用軍前後隊伍皆以所撰詞授之使揭聲而唱謂之御  
製至于入陣不論勝負馬頭纔轉則眾歌齊作故凡所  
關戰人忘其死斯亦用軍之一奇也 莊宗好獵每出  
未有不蹂踏苗稼一旦至中牟合圍忽有縣令忘其姓  
名犯圍諫曰大凡有國家者當視民如赤子性命所繫  
陛下以一時之娛恣其蹂踏使比屋囂然動溝壑之慮  
爲民父母豈其若是耶莊宗大怒以爲遭縣令所辱遂  
叱退將斬之伶官鏡新磨者知其不可乃舉眾伶齊進  
挽住令佯爲諾責曰汝爲縣令可以指麾百姓爲兒既  
天子好獵卽合多留閑地安得縱百姓耕鋤妨天子鷹  
犬飛走耶而又不能自責更敢咄咄吾知汝當死罪諸  
伶亦皆嬉矣繼和于是莊宗默然其怒少霽頃之忽縣  
令罪五代史闕文莊宗嘗因博戲觀骰子采有暗相  
輪者心悅之乃自置暗箭格凡博戲並認采之在下者  
及同光未鄴都兵亂從謙以兵犯興教門莊宗禦之中  
流矢而崩識者以爲暗箭之應

史臣曰莊宗以雄圖而起河汾以力戰而平汴洛家讐

既雪國祚中興雖少康之嗣夏配天光武之膺圖受命  
亦無以加也然得之孔勞失之何速豈不以驕于驟勝  
逸於居安忘櫛沐之艱難狗色禽之荒樂外則伶人亂  
政內則牝雞司晨斲恡貨財激六軍之憤怨徵搜輿賦  
竭萬姓之脂膏大臣無罪以獲誅眾口吞聲而避禍夫  
有一於此未或不亡矧咸有之不亡何待靜而言之足  
以爲萬代之炯誠也

永樂大典卷七  
千一百五十八

舊五代史卷三十四終

舊五代史卷三十四攷證

唐莊宗紀八令朱守殷以兵圍其第 案圍其第歐陽  
史作圍其館胡三省云歐陽史蓋謂朱友謙無私第  
在洛陽也據雲谷雜記唐末藩鎮八朝館舍皆稱邸  
第似無庸更易其字通鑑仍從是書作第

三月丁未朔 丁未通鑑作丁巳

庚戌李紹真自邢州赴鄴都城下 案通鑑作庚申李  
紹真引兵至鄴都營於城西北以太等徇于鄴城下  
而殺之與是書異

甲寅進營于觀音門外下令諸軍詰旦攻城是夜城下



軍亂 案通鑑作壬戌李嗣源至鄴都甲子夜軍亂  
攷異引莊宗實錄作壬戌至鄴都癸亥夜軍士張破  
敗作亂與是書異日通鑑從是書

帝遣嗣源子從審 從審歐陽史及通鑑俱作從璟是  
書本紀前後俱作從審未知何據

帝幸耀店以勞之 耀店通鑑作鶴店胡三省注云薛  
史作耀店今仍其舊

甲戌次石橋 甲戌通鑑作甲申

五坊人善友 案通鑑作鷹坊人善友胡三省注云鷹  
坊唐時五坊之一也善姓也

安巴堅舊作阿保機今改 阿都欲舊作阿咄欲今改

舊五代史卷三十四攷證

舊五代史卷三十五

宋司空同中書門下平章事薛居正等撰

明宗紀第一

唐書十一

明宗聖德和武欽孝皇帝諱亶初名嗣源及卽位改今諱代北人也世事武皇及其賜姓也遂編于屬籍四代

祖諱聿皇贈麟州刺史天成初追尊爲孝恭皇帝廟號

惠祖陵曰遂陵高祖妣衛國夫人崔氏追諡爲孝恭昭

皇后三代祖諱教

案原本作諱教今從五代會要改正

皇贈朔州刺史追

尊爲孝質皇帝廟號毅祖陵曰衍陵曾祖妣趙國夫人

張氏追諡爲孝質順皇后皇祖諱玟皇贈蔚州刺史追

尊爲孝靖皇帝廟號烈祖陵曰奕陵皇祖妣秦國夫人  
何氏追諡爲孝靖穆皇后皇考諱寬皇贈汾州刺史追  
尊爲孝成皇帝廟號德祖陵曰慶陵皇妣宋國夫人劉  
氏追諡爲孝成懿皇后帝卽孝成之元子也以唐咸通  
丁亥歲九月九日懿皇后生帝于應州之金城縣初孝  
成事唐獻祖爲愛將獻祖之失振武爲吐渾所攻部下  
離散孝成獨奮忠義解蔚州之圍武皇之鎮鴈門也孝  
成獸代帝年甫十三善騎射獻祖見而撫之曰英氣如  
父可侍吾左右每從圍獵仰射飛鳥控弦必中尋隸武  
皇帳下武皇遇上源之難將佐罹害者甚眾帝時年十

七翼武皇踰垣脫難于亂兵流矢之內獨無所傷武皇  
鎮河東以帝掌親騎時李存信爲蕃漢大將每總兵征  
討師多不利武皇遂選帝副之所向克振帝嘗宿于鴈  
門逆旅媼方娠不時具饌媼聞腹中兒語云大家至矣  
速宜進食媼異之遽起親奉庖爨甚恭帝詰之媼告其

故案北夢瑣言云帝以媼前倨後恭詰之曰公貴不可  
言也問其故具道娘子腹語事帝曰老媼遜言懼吾  
辱耳後果如其言帝旣壯雄武獨斷謙和下士每有戰功未嘗

自伐居常唯治兵仗持廉處靜晏如也武皇常試之召  
于泉府命恣其所取帝唯持束帛數緡而出凡所賜與  
分給部下嘗與諸將會諸將矜衒武勇帝徐曰公輩以

口擊賊吾以手擊賊眾慙而止景福初黑山戍將王弁  
據振武叛帝率其屬攻之擒弁以獻乾甯三年梁人急  
攻兗鄆鄆帥朱瑄求救于武皇武皇先遣騎將李承嗣  
史儼援之復遣李存信將兵三萬屯于莘縣聞汴兵益  
盛攻兗甚急存信遣帝率三百騎而往敗汴兵于任城  
遂解兗州之圍朱瑾見帝執手涕謝其年魏帥羅弘信  
背盟襲破李存信于莘縣帝奮命殿軍而還武皇嘉其  
功卽以所屬五百騎號曰橫衝都侍于帳下故兩河間  
目帝爲李橫衝明年武皇遣大將李嗣昭率師下馬嶺  
關將復邢洺梁將葛從周以兵應援嗣昭兵敗退入青

山口梁軍扼其路步兵不戰自潰嗣昭不能制會帝本軍至謂嗣昭曰步兵雖散若吾輩空迴大事去矣爲公試決一戰不捷而死差勝被囚嗣昭曰吾爲卿副帝率其屬解鞍礪鏃憑高列陣左右指畫梁人莫之測因呼曰吾王命我取葛司徒他士可無併命卽徑犯其陣奮擊如神嗣昭繼進梁軍卽時退去帝與嗣昭收兵入關帝四中流矢血流被股武皇解衣授藥手賜卮酒撫其背曰吾兒神人也微吾兒幾爲從周所笑自青山之戰名聞天下天復中梁祖遣氏叔琮將兵五萬營于洞渦是時諸道之師畢萃于太原郡縣多陷于梁晉陽城外



營壘相望武皇登陴號令不違飲食屬大雨彌旬城壘  
多壞武皇令帝與嗣昭分兵四出突入諸營梁軍由是  
引退帝率偏師追襲復郡邑昭宗之幸鳳翔也梁祖率  
眾攻圍岐下武皇奉詔應援遣李嗣昭周德威出師晉  
絳營于蒲縣嗣昭等軍大爲梁將朱友甯氏叔琮所敗  
梁之追兵直抵晉陽營于晉祠日以步騎環城武皇登  
城督眾憂形于色攻城既急武皇與大將謀欲出奔雲  
中帝曰攻守之謀據城百倍但兒等在必能固守乃止  
居數日潰軍稍集率敢死之士日夜分出諸門掩襲梁  
軍擒其驍將游崑崙等梁軍失勢乃燒營而退天祐五

年五月莊宗親將兵以救潞州之圍帝時領突騎左右  
軍與周德威分爲二廣帝晨至夾城東北隅命斧其鹿  
角負芻填塹下馬乘城大譟時德威登西北隅亦譟以  
應之帝先入夾城大破梁軍是日解圍其功居最柏鄉  
之役兩軍卽成列莊宗以梁軍甚盛慮師人之怯欲激  
壯之手持白金巨鍾賜帝酒謂之曰卿見南軍白馬赤  
馬都否觀之令人膽破帝曰彼虛有其表耳翌日當歸  
吾廡中莊宗撫髀大笑曰卿已氣吞之矣帝引鍾盡醕  
卽屬韃揮弭躍馬挺身與其部下百人直犯白馬都奮  
搗舞稍生挾二騎校而迴飛矢麗帝甲如蝟毛焉由是

三軍增氣自辰及未騎軍百戰帝往來衝擊執訊獲醜  
不可勝計是日梁軍大敗以功授代州刺史莊宗遣周  
德威伐幽州帝分兵略定山後八軍與劉守光愛將元  
行欽戰于廣邊軍凡八戰帝控弦發矢七中行欽酣戰  
不解矢亦中帝股拔矢復戰行欽窮蹙面縛乞降帝酌  
酒飲之撫其背曰吾子壯士也因厚遇之十三年二月  
莊宗與梁將劉鄩大戰于故元城北帝以三千騎環之  
鼓譟奮擊內外合勢鄩軍殆盡帝徇地磁洺四月相州  
張筠遁走乃以帝爲相州刺史九月滄州節度使戴思  
遠棄城歸汴小將毛璋據州納款莊宗命率兵慰撫旣

入城以軍府又安報莊宗書吏誤云已至滄州禮上畢

莊宗省狀怒曰嗣源反耶帝聞之懼歸罪于書吏斬之

未幾承制授邢州節度使十四年四月契丹按巴堅舊作

何保機今率眾攻幽州周德威間使告急莊宗召諸將

議進取之計諸將咸言敵勢不能持久野無所掠食盡

自還然後踵而擊之可也帝奏曰德威盡忠于家國孤

城被攻危亡在即不宜更待敵衰願假臣突騎五千爲

前鋒以援之莊宗曰公言是也即命帝與李存審閻寶

率軍赴援帝爲前鋒會軍于易州帝謂諸將曰敵騎以

馬上爲生不須營壘況彼眾我寡所宜銜枚箝馬潛行

溪澗襲其不備也八月師發上谷陰晦而雨帝仰天祈  
祝卽時晴霽師循大房嶺緣澗而進翌日敵騎大至每  
遇谷口敵騎扼其前帝與長子從珂奮命血戰敵卽解  
去我軍方得前進距幽州兩舍敵騎復當谷口而陣我  
軍失色帝曰爲將者受命忘家臨敵忘身以身殉國正  
在今日諸君觀吾父子與敵周旋因挺身入于敵陣以  
邊語論之曰爾輩非吾敵吾當與天皇較力耳舞搃奮  
擊萬眾披靡俄挾其酋帥而還我軍呼躍奮擊敵眾大  
敗勢如席卷委棄鎧仗羊馬殆不勝計是日解圍大軍  
入幽州周德威迎帝執手戲欵九月班師于魏州莊宗

親出郊勞進位檢校太保十八年十月從莊宗大破梁將戴思遠于戚城斬首二萬級莊宗以帝爲蕃漢副總管加同平章事二十年代李存審爲滄州節度使四月莊宗卽位于鄴宮帝進位檢校太傅兼侍中尋命帝率步騎五千襲鄆州下之授天平軍節度使五月梁人陷德勝南城圍楊劉以扼出師之路帝孤守汝陽四面拒寇久之莊宗方解楊劉之圍九月梁將王彥章以步騎萬人迫鄆州自中都渡汶帝遣長子從珂率騎逆戰于遞坊鎮獲梁將任釗等三百人彥章退保中都莊宗聞其捷自楊劉引軍至鄆以帝爲前鋒大破梁軍于中都

生擒王彥章等是日諸將稱賀莊宗以酒屬帝曰昨朕  
在朝城諸君多勸朕棄鄆州以河爲界賴副總管禦侮  
于前崇韜畫謀于內若信李紹宏輩大事已掃地矣莊  
宗與諸將議兵所向諸將多云青齊徐兗皆空城耳王  
師一臨不戰自下惟帝勸莊宗徑取汴州語在莊宗紀  
中莊宗嘉之帝卽時前進莊宗繼發中都十月己卯遲  
明帝先至汴州攻封丘門汴將王瓚開門迎降帝至建  
國門聞梁主已殂乃號令安撫廻軍于封禪寺辰時莊  
宗至帝迎謁路側莊宗大悅手引帝衣以首觸帝曰吾  
有天下由公之血戰也當與公共之尋進位兼中書令

二年正月契丹犯塞帝受命北征二月莊宗以郊天禮  
畢賜帝鐵券四月潞州小將楊立叛帝受詔討之五月  
擒楊立以獻六月進位太尉移鎮汴州代李存審爲蕃  
漢總管十二月契丹入塞三年正月帝領兵破契丹於  
涿州移授鎮州節度使先是帝領兵過鄴鄴庫素有御  
甲帝取五百聯以行是歲莊宗幸鄴知之怒甚無何帝  
奏請以長子從珂爲北京內衙都指揮使莊宗愈不悅  
曰軍政在吾安得爲子奏請吾之細鎧不奉詔旨強取  
其意何也令留守張憲自往取之左右說諭乃止帝憂  
恐不自安上表申理方解十二月帝朝于洛陽是時莊



宗失政四方饑饉軍士匱乏有賣兒貼婦者道路怨恚  
帝在京師頗爲謠言所屬洎朱友謙郭崇韜無名被戮  
中外大臣皆懷憂懼諸軍馬步都虞候朱守殷奉密旨  
伺帝起居守殷陰謂帝曰德業震主者身危功蓋天下  
者不賞公可謂震主矣宜自圖之無與禍會帝曰吾心  
不負天地禍福之來吾無所避付之于天卿勿多談也  
四年二月初六日趙在禮據魏州反莊宗遣元行欽將  
兵攻之行欽不利退保衛州初帝善遇樞密使李紹宏  
及帝在洛陽羣小多以飛語謗毀紹宏每爲庇護會行  
欽兵退河南尹張全義密奏請委帝北伐紹宏贊成之

遂遣帝將兵渡河三月六日帝至鄴都趙在禮等登城  
謝罪出牲餼以勞師帝亦慰納之營于鄴城之西南下  
令以九日攻城八日夜軍亂從馬直軍士有張破敗者  
號令諸軍各殺都將縱火焚營譟雷動至五鼓亂兵  
逼帝營親軍搏戰傷痍者殆半亂兵益盛帝叱之責其  
狂逆之狀亂兵對曰昨貝州戍兵主上不垂原宥又聞  
鄴城平定之後欲盡坑全軍某等初無叛志直畏死耳  
已共諸軍商量與城中合勢擊退諸道之師欲主上帝  
河南請令公帝河北帝泣而拒之亂兵呼曰令公欲何  
之不帝河北則爲他人所有苟不見幾事當不測抽戈

露刃環帝左右安重誨霍彥威躡帝足請詭隨之因爲

亂兵迫入鄴城懸橋已發共扶帝越濠而入趙在禮等

歡泣奉迎

通鑑亂兵擁嗣源及李紹真等入城城中不受外兵皇甫暉逆擊張破敗斬之外兵皆潰

趙在禮等率諸校迎拜嗣源

是日饗將士于行宮在禮等不納外兵

軍眾流散無所歸向帝登南樓謂在禮曰欲建大事非

兵不能集事吾自于城外招撫諸軍帝乃得出夜至魏

縣部下不滿百人時霍彥威所將鎮州兵五千人獨不

亂聞帝既出相率歸帝詰朝帝登城掩泣曰國家患難

一至于此來日歸藩上章徐圖再舉安重誨霍彥威等

曰此言非便也國家付以閫外之事不幸師徒逼燒爲

賊驚奔元行欽狂妄小人彼在城南未聞戰聲無故棄甲如朝天之日信其奏陳何所不至若歸藩聽命便是強據要君正墮讒慝之口也正當星行歸闕面叩玉階讒間沮謀庶全功業無便于此者也帝從之十一日發魏縣至相州獲官馬二千匹始得成軍元行欽退保衛州果以飛語上奏帝上章申理莊宗遣帝子從審及內官白從訓齎詔諭帝從審至衛州爲行欽所械帝奏章亦不達帝乃趨白臯渡駐軍于河上會山東上供綱載絹數船適至乃取以賞軍軍士以之增氣及將濟以渡船甚少帝方憂之忽有木棧數隻沿流而至卽用以濟

師故無留滯焉二十六日至汴州莊宗領兵至滎澤遣龍驤都校姚彥溫爲前鋒是日彥溫率部下八百騎歸于帝具言主上爲行欽所惑事勢已離難與共事帝曰卿自不忠言何悖也乃奪其兵仍下令曰主上未諒吾心遂致軍情至此宜速赴京師旣而房知溫杜晏球自北面相繼而至四月丁亥朔至饜子谷聞蕭墻釁作莊宗晏駕帝慟哭不自勝詰旦朱守殷遣人馳報京城大亂燔剽不息請速至京師己丑帝至洛陽止于舊宅分命諸將止其焚掠百官弊衣旅見帝謝之歛衽泣涕時魏王繼岌征蜀未還帝謂朱守殷曰公善巡撫以待魏

王吾當奉大行梓宮山陵禮畢卽歸藩矣是日羣臣諸將上牋勸進帝面諭止之樞密使李紹宏張居翰宰相豆盧革韋說六軍馬步都虞候朱守殷青州節度使符習徐州節度使霍彥威宋州節度使杜晏球兗州節度使房知溫等頓首言曰帝王應運蓋有天命三靈所屬當協冥符福之所鍾不可以謙遜免道之已喪不可以智力求前代因敗爲功殷憂啟聖少康重興于有夏平王再復于宗周其命維新不失舊物今日廟社無依人神乏主天命所屬人何能爭光武所謂使成帝再生無以讓天下願殿下俯徇樂推時哉無失軍國大事望以

教領令施行帝優答不從壬辰文武百寮三拜牋請行  
監國之儀以安宗社答旨從之既而有司上監國儀注  
甲午幸大內興聖宮始受百寮班見之儀所司議卽位  
儀注霍彥威孔循等言唐之運數已衰不如自創新號  
因請改國號不從土德帝問藩邸侍臣左右奏曰先帝  
以賜姓宗屬爲唐雪冤以繼唐祚今梁朝舊人不願殿  
下稱唐請更名號帝曰予年十三事獻祖以予宗屬愛  
幸不異所生事武皇三十年排難解紛櫛風沐雨冒刃  
血戰體無完膚何艱險之不歷武皇功業卽予功業先  
帝天下卽予天下也兄亡弟紹于義何嫌且同宗異號

出何典禮運之衰隆吾自當之眾之莠言吾無取也時羣臣集議依違不定唯吏部尚書李琪議曰殿下宗室勲賢立大功于三世一朝兩泣赴難安定宗社撫事因心不失舊物若別新統制則新朝便是路人熒熒梓宮何所歸往不唯殿下追感舊君之義羣臣何安請以本朝言之則睿宗文宗武宗皆以弟兄相繼卽位柩前如儲后之儀可也于是羣議始定河中軍校王舜賢奏節度使李存霸以今月三日出奔不知所在乙未勅曰寡人允副羣情方監國事外安黎庶內睦宗親庶諧敦敘之規永保隆平之運昨京師變起禍難薦臻至于戚屬



之間不測驚奔之所慮因藏竄濫被傷夷言念于茲自  
然流涕宜令河南府及諸道應諸王眷屬等昨因驚擾  
出奔所至之處卽時津送赴闕如不幸物故者量事收

瘞以聞

北夢瑣言莊宗諸弟存紀存確匿于南山民家  
人有以報安重誨者重誨曰主上以下詔尋訪

帝之仁德必不加害不如密令殺之果併命  
于民家後明宗聞之切讓重誨傷惜久之以中門使

安重誨爲樞密使以鎮州別駕張延朗爲樞密副使以

客將范延光爲宣徽使進奏官馮斌爲內客省使丙申

下敕今年夏苗委人戶自供通頃畝五家爲保本州具

帳送省州縣不得差人檢括如人戶隱欺許人陳告其

田倍徵已亥命石敬瑭權知陝州兵馬留後皇子從珂

權知河南府兵馬留後庚子淮南楊溥進新茶以權知  
汴州軍州事孔循爲樞密副使以陳州刺州劉仲殷爲  
鄧州留後以鄭州防禦使王思同爲同州留後勅曰租  
庸使孔謙濫承委寄專掌重權侵剝萬端姦欺百變遂  
使生靈塗炭軍士饑寒成天下之瘡痍極人間之疲弊  
載詳眾狀側聽輿詞難私降黜之文合正殛誅之典宜  
削奪在身官爵按軍令處分雖犯眾怒特貸全家所有  
田宅並從籍沒是日謙伏誅勅停租庸名額依舊爲鹽  
鐵戶部度支三司委宰臣豆盧革專判中書門下上言  
請停廢諸道監軍使內勾司租庸院大程官出放猪羊

柴炭戶括田竿尺一依朱梁制度仍委節度刺史通申  
三司不得差使量檢州使公廨錢物先被租庸院管係  
今據却還州府州府不得科率百姓百姓合散蠶鹽每  
年祇二月內一度俵散依夏稅限納錢夏秋苗稅子除  
元徵石斗及地頭錢餘外不得紐配先遇赦所放逋稅  
租庸違制徵收並與除放今欲曉告河南府及諸道準  
此施行從之是日宋州節度使元行欽伏誅壬寅以樞

密副使孔循爲樞密使

永樂大典卷七  
千一百六十四

舊五代史卷三十五終

舊五代史卷三十五攷證

唐明宗紀一三代祖諱教 教原本作敖今據五代會  
要改正

皇考諱霓 歐陽史云父電未知孰是

襲破李存信於莘縣 莘縣原本作華縣今據新唐書  
藩鎮傳改正

柏鄉之役 柏鄉原本訛松鄉今據通鑑改正

吾當與天皇較力耳 天皇原本作人皇攷遼史太祖  
稱爲天皇讓宗追稱人皇莊宗初年侵幽州者乃太  
祖非讓宗也今改正

十二月契丹入寇三年正月帝領兵破契丹于涿州

案歐陽史云冬契丹侵漁陽嗣源敗之于涿州入寇  
破敵皆作冬間事蓋順文併敘之耳當以是書爲徵  
實

請令公帝河北 河北原本作河中今據通鑑改正

獲官馬二千匹 案歐陽史作掠小坊馬三千匹

四月丁亥朔 案丁亥朔與莊宗紀異據莊宗紀三月  
丁未朔則四月當作丁丑據此紀下文有己丑甲午  
則當作丁亥前後參差未詳孰是

己丑 案通鑑作乙丑疑傳寫之訛歐陽史從是書作

已丑

以樞密副使孔循爲樞密使 案歐陽史作左驍衛大將軍孔循爲樞密使吳縝纂誤云孔循傳作左衛大將軍爲樞密使俱與是書異

安巴堅舊作阿保機今改

舊五代史卷三十五攷證